

NSODOLO YA KENTO YA MAKWELA



Bantu ya kubela mingi. Mu lenda ve kubaka bawu nyonso na mbala mosi. Kasi, beno kuwa.

² Kieleka mu kele dyaka na kyese na kuvwanda awa, na nkokila yayi, na kati ya kivinga yayi ya kitoko, na kati ya nkonga ya bantu ya mbote mingi. Mpe na yina beto vwandaka kota, na ngaanda kuna, mwa ntangu fyoti me luta, bantu yina vwandaka kuna na bala-bala vwanda tuba ti ba lendaka ve na kukota. Mpe mu tubaka, “Mbote, mu banza mu lenda kuzwa beno kisika mosi.” Mpe ba bikaka bawu ve kukulumuka. Na yawu mu ke lomba lemvo samu ti beto kele na bisika mingi ve samu na bawu. Ba me tuba ti yisi ya yinzo mpe, kele ya kufulukuka. Mpe na yawu beto me lomba lemvo samu na yawu. Kasi beto kele na kyese na kuvwanda awa, mpe kyese na kumona bankonga nyonso yayi ya balongi ya mbote, bantu ya mumbungu awa, mpe nkonga ya bimonikisi nyonso yina me katuka bisika yankaka ya yinsi.

³ Mu vwanda me kuzwa ntangu ya mbote ya kuzonza na suka yayi na madya ya suka, yina kieleka me vwanda ya lukumu mu me zola mingi na kuzonza na ntwala ya bantu ya mbote ya mutindu yayi. Dilongi ya munu vwandaka: *Mpusu Fwana Kuzwa Ve Difwa Na Mbuma Ya Blé*. Mu vwanda me manisisa yawu ve. Mpe ya vwandaka ve foti ya mpangi ya bakala. Yandi mekaka na kuzwa na muswa ya ntwadisi samu beto vwanda mwa ntangu fyoti dyaka, kasi yandi zolaka kaka ve kusala yawu. Kieleka mu me sepela na yawu, Mpangi Demos. Ya kele kieleka, kieleka mbote. Kieleka mu me tonda beno, mosi na mosi samu na bumbote ya beno. Kasi ba zolaka kaka ve ti beto kusala yawu. Na yawu beto zolaka—zolaka kaka kusukisa. Mu ke vutukila yawu, kilumbu mosi yankaka, samu na kumanisa yawu: *Mpusu Ke Kuzwa Ve Difwa Na Mbuma Ya Blé*. Beno me bakula yawu, beno bayina vwandaka awa? Mu banza ti ya kulunga me vwanda ti ya ke bakulama.

⁴ Ntangu yayi, mu zaba, na nkokila yayi, ya ke vwanda na kimoko, mpe, na yawu mu zola ve kubumba beno ntangu mingi awa ti beno kondwa yawu. Samu, mu banza ti ya vwandaka kieleka mbote samu—samu na bantu ya lukwikilu ya Pantekote, kimoko yina beto monaka nkokila yankaka yina. Nkonga mosi ya bantu ya mbote, mwa bamvutu ya mbote mingi, ya kusungama. Ya salaka munu kutala kieleka mbote, na kumona yawu. Mu ke na kivuvu ti Mfumu ke sakumuna yawu, na nkokila yayi. Mpe ti bantu nyonso yina ke tala, ti bawu kukwikila. Ya ke

vwanda kisambu ya munu ya kieleka.

⁵ Mpe bimbangi mingi me kwiza, bubu yayi, na mail mpe na alo-alo, ya bantu mingi yina vwandaka me beluka na lukutakanu yayi. Mu sepelaka mingi samu na yawu. Ti, ya kele, kumona bantu ya kubela, ya kele mutindu ya kusalu ya munu.

⁶ Mu—mu ke mataka awa samu na kulonga. Mu, beno zaba, mu kele longi ve. Kasi munu, na, grammaire ya munu yayi ya Kentucky, “his, hain’t” mpe—mpe bampova nyonso yango, na yawu mu—mu lenda tuba ve mutindu yina ba ke bokilaka longi ya kilumbu ya bubu yayi. Mu—mu lenda ve kubaka kisika yina, samu ti mu—mu me longukaka ve.

⁷ Kasi samu na bayankaka, mu ke salaka mutindu samu na kubasisa dibanza yina mu zaba na zulu ya Yawu, to samu na bayankaka, mutindu mu ke tala ti mu zaba na zulu ya Yawu, mutindu mu longukaka Yawu, mutindu Yandi kele samu na munu. Yandi kele luzingu ya munu nyonso, nyonso yina mu lendaka banza kuvwanda, mpe ya kulutula mingi dyaka na yina mu banzaka ntete ve, ti na mpasi, mu zola kuzwa nkundi, na zulu ya ntoto, ntangu mu vwandaka mwa mwana ya bakala. Kasi kieleka mu ke vutula matondo samu na bankundi ya nene bubu yayi.

⁸ Mu . . . [Mpangi mosi ya bakala me tuba, “Ya kele mwa mpasi na kuwa na manima kuna, Mpangi Branham. Belama.”—Mu.] Oh, beno lemvočila munu. Mu—mu kele mutindu ya kutelama ve mbote awa, kisika mosi, yandi me tuba.

⁹ Ntangu yayi, samu na kukota mbala mosi na kati ya kusalu, beto baka mwa Masonuku samu na kutanga. Mu—mu ntangu nyonso ke zolaka kutanga Biblia, samu ti Yawu kele Ndinga ya Nzambi. Mu ke kwikila yawu. Mpe mu ke kwikila ti Yawu kele Ndinga ya Nzambi yina lenda kukondwa ve. Mpe awa mu ke na mwa Masonuku ya kusonama awa, mpe mwa banoti yina mu zola kulandila, samu na mwa ntangu fyoti, mu banza baminuti makumi yiya na tanu.

¹⁰ Mpe kuna beto ke basika na ngunga ya mbote samu na kwenda mona dyaka kimoko yayi ya mbote na nkokila yayi. Mpe mu ke na kivuvu ti Nzambi ke landila na kusakumuna beno tii na nsuka. Mpe mu zaba yina beno fwana kusala. Mpe mu fwana dyaka, tambula na ditoma tii na Tucson, na nkokila yayi, beno me mona, na yawu beno lenda tala. Ya kele kunata ditoma bangunga kumi.

¹¹ Mpe mu ke zyeta na bayinsi ya nzenza, mpe mu fwana kuzwa vaccin ya kizama ya fièvre jaune na suka na yinzo ya luyalu. Na yawu mu—mu fwana kwenda kuna. Ba ndimaka kuvutula yawu, kilumbu yankaka yina, mpe ba ke ndima dyaka ve mvutu “ve” ntangu yayi. Mpe mu ke dyaka na tétanos mpe typhus mosi ya kuzwa, mpe ba-vaccin ya kuvutukila.

¹² Na yina, munu, ke vutula mingi matondo samu na ntangu ya mbote yayi, mpe—mpe samu na balukutakanu yayi ya mbote yina beto vwandaka me kuzwa ntete kimoko yayi. Kieleka ya sepelisaka ntima ya munu. Beno kele nkonga mosi ya bantu ya mbote. Mu ke na kivuvu ti Nzambi ke sakumuna beno.

¹³ Ntangu ngunga ya nene kisika . . . Dalango ya nene yina yina vwandaka ya kulala kuna, yina balukaka na nswalu na Alaska, bilumbu fyoti me luta, yandi losaka mukila ya yandi dyaka na suka yayi, nzila nyonso, na bisika ya Washington. Kana yandi zolaka yandi zolaka baka nzila yayi, na malembe. Mpe kana Mpeve-Santu tubaka kaka kwandi na munu . . .

¹⁴ Muntu mosi pesaka munu mvutu . . . lombaka munu ti, “Ya ke salama awa, Mpangi Branham?” Ve, mu zaba yawu ve. Mu zaba kaka ve, tii mu ke zaba. Ya kele kieleka.

¹⁵ Mu ke zolaka ntangu nyonso kuvwanda ya kusungama na beno. Mu ke banza ve, mu ke baka mabanza mosi ve, to kima mosi, yina mu ke kwikila, to kima mutindu yina. Ntangu mu ke tuba na beno, ya fwana vwanda yawu. Mbote, Yandi fwana tuba na munu, ntete, mpe na manima mu ke tuba na beno. Mu—mu zaba ti yinza ya muvimba kele na kati ya kuningana. Beto kele na nsuka ya ntangu. Kasi kima mosi mu me meka na kuvwanda . . .

¹⁶ Mpangi Shakarian vwandaka tuba na suka yayi, mutindu yandi vwanda lutaka na bandonga ya bisambu, mpe na kukumaka kuna mpe vwanda kuzwa bakalati yango ntete bantu kukwiza na estrade, mpe vwandaka tala yawu, mpe kumona kana—kana yina mu tubaka na bawu vwandaka yina bawu kusonikaka kuna. Ba vwanda sonika mitindu nyonso ya bima na zulu ya bakalati ya bawu ya bisambu, beno zaba, mpe yandi vwanda zola kaka kumona kana ya vwandaka ya kieleka. Yandi tubaka, na kati ya bankama yina yandi talaka, ya vwandaka na ata mosi ve yina vwandaka ya luvunu. Ya ke vwanda na ata mosi ve ya luvunu, beno me mona, samu ti, kana—kana ntangu nyonso ya kele Nzambi. Kana mu kotisa kwandi ya munu mosi na kati, kuna ya kele kaka ya luvunu kuna na kubanda.

¹⁷ Mwa mwana mosi ya kento yina tata kele ya kuvwanda awa, ke na kuwaka munu ntangu yayi, kwizaka na munu, ntama mingi ve. Yandi kuzwaka ndosi. Yandi tubaka, “Mpangi Branham, yinki zola kutuba ndosi yayi?”

¹⁸ Mu tubaka, “Mu zaba ve, mpangi ya kento. Mu fwana tala, kana Mfumu ke tuba na munu.” Na yawu mu kwendaka mpe mu mekaka na kuyufula Mfumu, mpe ata mbala mosi ve Yandi tubaka na munu.

¹⁹ Mwa mwana yango ya kento vutukaka dyaka. Yandi tubaka, “Mbote, awa yinki kele ntendulu ya ndosi ya munu?”

²⁰ Mu tubaka, “Kwiza awa, cherie, vwanda na yisi.” Mu tubaka, “Tata mpe mama ya nge kele kieleka bankundi ya mbote ya munu. Nge me mona? Mpe bawu me kwiza nzila nyonso katuka

Canada, bawu kele bantu ya kulemba, mpe me kwiza vwanda awa na munu. Bawu ke kwikilaka yayi, yina mu ke na kumeka na kutuba. Mpe ata mbala mosi ve ti mu me tubaka kima ya luvunu na muntu, na luzolo ya munu mosi, na luzingu ya munu. Kana mu . . . Mu banza ti mu zaba yina zola kutuba ndosi yango. Kana tii mu ke mona ndosi yango munu mosi ve, mpe dyaka ti Yandi kutuba na munu yina ya zola kutuba, mu lenda ve kutuba na nge. Nge me mona, kana mu yidika kima, ya lendaka vwanda na ntangu kisika nge lenda vwanda na nsatu ya munu na kati-kati ya luzingu mpe lufwa, mpe kuna nge ke zaba ve kana kukwikila munu to ve.”

²¹ Kana mu tuba na nge kima na Nkumbu ya Mfumu, kieleka ya kele yawu. Ya kele Yandi me tuba na munu yawu. Mpe tii awa, bamvula nyonso yayi, na yinza ya muvimba, mpe bisika nyonso na yinza, Yawu me vunaka ata kilumbu mosi ve. Samu . . . Mpe, ntangu yayi, beno zaba muntu ya moyo lenda kuvwanda ve yina ke kondwaka ve. Ya ke lomba Mpeve ya Nzambi samu na kusala yawu.

²² Mpe awa mu ke na Nsangu yina mu ke pesa mvutu. Mpe bambala mingi ba ke talaka munu, na kati-kati ya bantu, mbote, ya lenda vwanda na muntu yina me vwanda kaka na yisi ve mpe me banza minuti, ti mu vwandaka, oh, muntu ya yimbi, ti mu zola bantu ve, mpe ti mu ntangu nyonso ke niongisaka bawu. Mpe ya kele kieleka ve. Ya kele mutindu yina ve. Mu zola bantu. Kasi, beno zaba, zola ke sembaka.

²³ Kana mwa mwana ya beno ya bakala vwandaka ya kuvwanda na bala-bala kuna, mpe beno ke tuba, “Junior, cheri, mu zola ve ti nge vwanda na ngaaanda kuna, kasi . . .” Mpe ti matoma kuluta na mbangu na lweka ya yandi, mpe beno ke kotisa yandi. Ti yandi kuvutuka dyaka na ngaanda na mbangu. Kuna, beno ke semba yandi. Kana beno zola yandi, beno ke sala yawu. Beno fwana sala yawu.

²⁴ Kana beno mona muntu kukulumuka nzadi, na kati ya bwatu ya fyoti, na ntwala ya kasiba, ti beno zaba ti bwatu yina ke dyama ntangu yawu ke kubwa na kasiba, beno ke tuba, “Jean, nge, mu banza ti nge fwana banza fyoti, mu banza ti nge lenda kusala yawu ve”? Kana mu zaba ti yandi ke lenda yawu ve, mu ke basisa yandi na kutala na bwatu yina, kana mu lenda, samu ti ya kele zola yina ke na kusala yawu.

²⁵ Mpe awa, na Bansangu yayi yina mu ke zonzaka, mu ke mekaka ve na kukotisa ata malongi, to nyonso yina. Mu—mu ke salaka yawu na dibuundu ya munu mosi. Kasi awa na ngaanda na kati-kati ya babakala mpe bakento yina kele ya badenomination yankaka mpe ya mabanza yankaka, mu ke mekaka na kubaka mutindu ya malembe, samu na kutendula; kasi ya kulunga na kisika kana beno kele ya kubutama ya Mpeve ya Nzambi, mu banza ti beno ke bakula yina mu zola kutuba, na

kati ya babakala ya Baklisto, ba-Méthodiste, ba-Baptiste, ba-Presbytérien, na nyonso yankaka yina.

²⁶ Ntangu yayi, na nkokila yayi, mu zola kubaka Genèse, kapu 24. Mu zola kutanga...kubanda na nzila 12 ya kapu 24 ya Genèse.

Mpe yandi tubaka, O MFUMU Nzambi...mfumu ya munu Abraham, mu ke lombana nge, sala munu na nswalu mbote kilumbu yayi, mpe lakisa bumbote na mfumu ya munu Abraham.

Tala, mu kele ya kutelama awa pene-pene ya dibulu ya maza; mpe bana ya bakento ya bantu ya mbanza ke kwiza na kubaka maza:

Mpe ti ya kusalama, ti ntwenya ya kento na yandi yina mu ke tuba, tula na yisi dibungu, mu ke lombana nge, ti mu kunwa maza; mpe ti yandi tuba, Kunwa, mpe mu ke pesa mpe ya kunwa na basamo ya nge: ti yandi vwanda yina nge kubikaka samu na kisadi ya nge Isaac; mpe kuna mu ke zaba ti nge me lakisa munu bumbote na...na mfumu ya munu.

²⁷ Mpe dyaka na Buku ya Apocalypse. Ya kele ya ntete na Biblia, Genèse. Ntangu yayi, na nsuka ya Biblia, mu zola kutanga na Apocalypse kapu 21, mpe nzila ya 9.

²⁸ Beto zaba yina Masonuku yayi ya Genèse awa...Beno tanga kapu ya muvimba, kana beno zola. Ya kele Nzambi ke na kufidisaka Éliézer. To, Abraham ke na kufidisaka Éliézer, beno lemvo kila munu, samu na kusola kento ya makwela samu na Isaac. Mpe Rébecca ya kitoko mingi me basika, mpe mvutu ya kulunga ya bisambu yina—yina Éliézer, kisadi ya Abraham, kulombaka kaka.

Ntangu yayi na nzila ya 9 ya Apocalypse kapu 21.

Mpe kuna me kwiza na munu mosi na kati ya bawanzio sambwadi yina vwanaka ya kusimba bambungu sambwadi ya kufulukana na bampasi sambwadi ya nsuka, mpe zabisaka na munu, na kutubaka, Kwiza awa, mpe mu ke lakisa nge kento ya makwela, kento ya Mwana-dimeme.

²⁹ Ntangu yayi mu zola kubaka mutindu dilongi, na nkokila yayi, landila yina: *Nsodolo Ya Kento Ya Makwela*. Mpe yayi kele, kana mpangi ya munu ya bakala yina ke na kubakaka na bande awa zola, yayi kele bande yina beno lenda bika kubasika.

³⁰ Mpe ntangu yayi, na yayi, ya zola kutuba kaka ve ti mu ke na kuzonzilaka yayi na dibuundu yayi yina kele awa, kasi babande yayi ke kwendaka bisika nyonso na yinza. Ba ke bangulaka yawu, na kutala, oh, na bandinga mingi, mpe na bayinsi ya mimpani bisika nyonso na yinza. Beto ke fidisaka bawu babande, ya mpamba, na kimvuka ya dibuundu. Mpe bawu

ke bangulaka yawu. Mpe babande yayi ke kwendaka, bamfinda nyonso ya Afrika, mpe na Inde, mpe bisika nyonso na yinza.

Ntangu yayi, nsodolo ya Kento ya makwela!

³¹ Na bima mingi ya luzingu ya me pesama na beto na kusala nsodolo. Mutindu ya luzingu, yawu mosi, kele nsodolo. Beto kele na muswa ya kusala mutindu ya beto mosi, kusola mutindu ya beto mosi yina beto zola kuzinga.

³² Kulongoka kele nsodolo. Beto lenda sola kana beto ke vwanda ya kulongoka, to kana beto ke vwanda ya kulongoka ve. Ya kele nsodolo yina kele na beto.

³³ Mbote mpe yimbi kele nsodolo. Bakala nyonso, kento nyonso, mwana ya bakala mpe mwana ya kento, fwana sola kana bawu ke meka na kuzinga mbote to kuzinga mbote ve. Ya kele nsodolo.

Nsodolo kele kima ya nene.

³⁴ Kisika ya beno ya kukuma ya Seko kele nsodolo. Mpe mu banza ti, na nkokila yayi, bayankaka ya beno ke sala nsodolo yango—yango, ya kisika beno ke zinga Seko, ntete lukutakanu yayi kusuka na nkokila yayi. Ya ke vwanda na ntangu mosi, yina, kana beno me manga Nzambi bambala mingi, ya ke vwanda na ntangu mosi beno ke manga Yandi na mbala ya nsuka. Ya kele na nzila na kati-kati ya kyadi mpe lusambusu. Mpe ya kele kima ya boma samu na bakala to kento, mwana ya bakala to mwana ya kento, na kusabuka nzila yango, samu ti kuvutuka kele ve ntangu beno ke sabuka ndilu yina. Na yawu, na nkokila yayi, ya lendaka vwanda ntangu yina mingi ke baka lukanu ya bawu—ya bawu, kisika bawu ke zinga Seko kukondwa nsuka.

³⁵ Ya kele na nsodolo yankaka yina kele na beto na luzingu, ya kele, nkundi ya luzingu. Ntwenya ya bakala to ntwenya ya kento, yina ke na kukota na luzingu, ba me—me pesa yandi muswa ya kusala nsodolo. Ntwenya ya bakala ke sola. Ntwenya ya kento ke na muswa ya kundima to kumanga yawu. Kasi ya kele dyaka nsodolo, na balweka nyonso zole. Bawu nyonso zole bakala mpe kento, bawu ke na muswa ya kusola.

Mpe, beno ke na nsodolo, mutindu Muklisto.

³⁶ Beno ke na nsodolo ya dibuundu, awa na Amerika, tii awa, kisika beno zola kukwenda. Ya kele na ntangu ya mbote- mbote ya beno mosi muntu ya Amerika, na kusola dibuundu nyonso yina beno zola kukwendaka. Ya kele nsodolo. Beno zola to ve kukwenda na mosi ya bawu, kana beno zola ve. Kasi kana beno zola kusoba Méthodiste na Baptiste, to Katolika na ba-Protestant, to nyonso yankaka yina, ya kele na muntu ve yina lenda tuba na beno to kusala beno kukwiza ata na dibuundu mosi. Yina kele ya beto—ya kele kimpwanza ya beto. Yina kele yina démocratie ya beto kele. Muntu nyonso lenda sola samu na yandi mosi. Kimpwanza ya nsambulu, mpe ya kele kima ya nene.

Nzambi sadisa beto na kubumba yawu mutindu yina ntangu nyonso beto lenda.

³⁷ Beno ke na nsodolo mpe. Kana... Ntangu beno ke sola dibuundu yayi, beno lenda sola kana beno, na kati ya dibuundu yayi, to beno ke sola dibuundu yina ke twadisa beno na kisika ya beno ya kukuma ya Seko. Beno lenda sola dibuundu yina ke na credo mosi ya bantu, ti beno lendaka banza ti credo yango ya bantu kele kaka yina beno zola. To, dibuundu yankaka ke na credo ya bawu ya bantu.

³⁸ Mpe dyaka ya kele na Ndinga ya Nzambi, beno kele na nsodolo. Beno fwana sala nsodolo.

Ya kele na musiku ya kusonama ve na kati ya beto, ya nsodolo.

³⁹ Mu banza ya vwandaka Élie, kilumbu mosi, na zulu ya Mongo Carmel, na manima ya kumekama ya ngolo, na ngunga ya nene ya mpati yina beto ke na kubelama kaka ntangu yayi. Mpe mu banza ti, ya lendaka vwanda beno to munu, na nkokila yayi, ti beto ke sala nsodolo yayi, mutindu nzingulu ya Mongo Carmel. Kieleka, mu banza ti ya ke na kusalamaka, na yinza ya muvimba, na ntangu yayi. Kasi ntama mingi ve ya ke vwanda na ntangu kisika yina beno fwana kusala nsodolo.

⁴⁰ Mpe beno bantu awa, ya mabuundu ya beno ya ba-dénomination, beno kwikila kaka yayi, ti ngunga kele kaka na zulu ya beno, ntangu beno ke sala nsodolo. Beno ke kota to ve na Conseil ya Yinza, to beno ke vwanda dyaka ve dénomination. Beno fwana kusala yawu, mpe nsodolo yina ke na kwiza ntama mingi ve.

⁴¹ Mpe ya kele kima ya boma na kuingila tii ngunga yango ya nsuka, mpe, samu ti beno lendaka kuzwa kima yina beno lendaka dyaka ve kukatukila. Beno zaba, ya kele na ntangu ba lenda pesa beno malongi, kuna, kana beno sabuka nzila yango ya malongi, kuna ba ke tula beno yimeni kinyemo na lweka yankaka, na kisengo ya mbwaki.

⁴² Beno bambuka moyo, ntangu mvula ya jubiléé vwanda kuma, mpe nganga-Nzambi vwanda tambula na zulu ya mpunda na kusalaka makelele na mpungi, ti konso mumpika lenda kwenda kimpwanza. Kasi kana bawu kumangaka na kundima kimpwanza ya bawu, kuna ba zolaka nata yandi na tempelo, na potu mosi, mpe kutobula yandi dikutu na kisengo mosi ya nsongi, mpe kuna yandi ke sadila mfumu ya yandi ntangu nyonso. Ba vwanda kutula yawu na dikutu ya yandi mutindu kifwanukusu, ya kuwa. “Lukwikilu ke kwizaka na kuwa.” Yandi kuwaka mpungi yango, kasi yandi zolaka ve kuwa yawu.

⁴³ Mpe bambala mingi, babakala mpe bakento ke kuwa Kieleka ya Nzambi, mpe ke mona Yawu me siamaka mpe kutesa, Kieleka, kasi dyaka bawu ke zola ve kuwa Yawu. Ya kele na ba dyambu yankaka dyaka ya kutuba. Ya kele na mwa nsodolo yankaka

yina bawu me kuzwa, na kisika ya kutala Kieleka mpe bisalu, samu na yina makutu ya bawu lenda vwanda ya kukangama na Nsangu ya mbote. Bawu ke kuwa dyaka Yawu ve. Malongi ya munu na beno, ntangu Nzambi ke zonzaka na ntima ya beno, beno kota na kisalu kaka kuna.

⁴⁴ Élie pesaka bawu nsodolo, yina bawu zolaka sala: “Benó sola kilumbu yayi nani beno ke sadila. Kana Nzambi kele Nzambi, beno sadila Yandi. Kasi kana Baal kele Nzambi, beno sadila yandi.”

⁴⁵ Ntangu yayi, mutindu beto ke mona ti nyonso ya bima ya ntoto kele kifwanukusu ya bima ya kimpeve, mutindu beto vwandaka me zonzila na lesó ya beto ya suka yayi, na yina mwini mpe yinza ya yandi. Ya vwandaka Biblia ya munu ya ntete. Ntete mu tanga ntete page ya Biblia, mu zabaka Nzambi. Samu ti, Biblia kele ya kusonika bisika nyonso na yinza, mpe ya ke fwanakanaka kaka na Ndinga ya Nzambi: mutindu lufwa, luzikulu, vumbukulu ya yinza; mpe mwini ke basika, ke sabuka, ke kota, ke kufwa, ke basika dyaka. Ya kele na bima mingi yina beto lenda fwanikisa, Nzambi na yinza, yina beto fwana bika, samu na Nsangu yayi.

⁴⁶ Ntangu yayi, kana kimpeve, to, yinza kele kifwanukusu ya kimpeve, na yina, nsodolo ya kento ya makwela, na yinza, kele kifwanukusu ya kusola Kento ya makwela, Kento ya makwela, na kimpeve.

⁴⁷ Ntangu yayi, ya kele kima ya kusakana ve ntangu beto ke kwenda sola kento, bakala, samu ti bandefi yango awa kele “tii lufwa ke kabula beno.” Ya kele mutindu yina beto fwana kubumba yawu. Mpe beno ke nata ndefi yango na ntwala ya Nzambi, ti kaka lufwa ke kabula beno. Mpe mu banza ti beto fwana. . . Bakala na dibanza ya kusungama, yina ke na kukubikaka bilumbu ya ntwala, ti yandi fwana sala nsodolo ya kento yango na malembe mingi. Benó sala keba na yina beno ke na kusalaka. Mpe kento yina ke na kusola bakala, to yina ke ndima nsodolo ya bakala, fwana sala keba mingi na yina yandi ke na kusalaka, mpe ya kulutila na bilumbu yayi. Bakala fwana banza mpe kusambila ntete yandi sola kento.

⁴⁸ Mu banza, bubu yayi, samu na yina. . . Beto kele na mambu ya kufwa ya makwela mingi ntangu yayi, samu ti beto Amerika kele ya ntete na yinza, na mambu ya kufwa makwela. Beto kele ya ntete na bayankaka na yinza. Ya kele na kufwa makwela mingi awa kulutila bisika yankaka, yinsi yayi, mpe na kutala kele, mpe ba ke talaka beto, yinsi ya Buklisto. Wapi dyambu ya nsoni, bayinzo ya beto ya lufundusu ya kufwa makwela! Mu banza, ya kele samu na yawu, kele samu ti babakala me bika Nzambi, mpe bakento me bika Nzambi.

⁴⁹ Mpe beto ke tala, ti, kana bakala kusambila mpe kento kusambila na zulu ya dyambu yango; kutalaka kaka ve na meso

ya kitoko, to mapeka ya nene ya ngolo, to kima mutindu yina, to mwa kima yankaka ya kuzola ya yinza; kasi zolaka tala ntete na Nzambi, mpe kutuba, “Nzambi, yayi kele lukanu ya Nge?”

⁵⁰ Mu banza, bubu yayi, kuvuna kele mingi, kaka mutindu na lukolo. Ntangu—ntangu bana ke kwizaka, na suka, bana mingi ya pene-pene ya beto, bayina—bayina kele bankundi ya munu, ke kwizaka na yinzo mpe ke tubaka, “Mpangi Branham, nge zola kusambila samu na beto? Beto kele na kizama bubu yayi. Mu—mu me sala mpimpa nyonso, mpe mu ke na kumona ve ti mu ke lenda—lenda kuzwa yawu. Sambila samu na munu.” Mu banza ti mwana nyonso ya lukolo, kana beno zola, kana . . . Mpe bibuti na mesa na suka, beno lenda tuba, “Mama, Jean ke na kizama bubu yayi. Beto sambila samu na yandi ntangu yayi.” Mu banza ti ya ke lutila mbote na yina nyonso beno ke zola kusala na mutindu nyonso, to kutala na zulu ya papié ya muntu yankaka mpe kuvuna, mu banza, kana beno zonza kaka mpe kusambila samu na dyambu yango.

⁵¹ Mpe kana beto zolaka fyongonina yina beto ke na kusalaka ntangu beto ke na kukota na makwela, ntangu beto ke solaka kento ya beto, bakala ya beto, kana beto zola kufyongonina yawu mbote! Bakala zolaka sambila na butsyelika, samu ti yandi lenda bebisa luzingu ya yandi nyonso. Beno bambuka moyo, ndefi yango kele “tii lufwa ke kabula beno,” mpe yandi lendaka bebisa luzingu ya yandi nyonso na kusalaka nsodolo ya yimbi. Kasi kana yandi zaba yina, yandi ke na kusalaka kele nsololo ya yimbi mpe ti ke kwelana na kento yina kele ya kulunga ve na kuvwanda kento ya yandi, mpe ti yandi kusala yawu na mutindu nyonso, kuna ya kele foti ya yandi. Kana kento ndima bakala mpe zaba ti yandi kele ya kulunga ve na kuvwanda bakala samu na yandi, kuna ya kele foti ya beno mosi, na manima beno me zaba yina kele mbote mpe yimbi. Na yawu, beno zolaka sala yawu ve tii beno ke sambila tii na nsuka ya mvutu.

⁵² Mutindu mosi ya ke vwanda samu na nsodolo ya dibuundu. Ntangu yayi, beno fwana sambila na zulu ya dibuundu yina beno ke kwendaka na kubundana. Beno bambuka moyo, bampeve kele na zulu ya mabuundu.

⁵³ Ntangu yayi, mu zola kuzonza yimbi ve. Kasi mu me tala ti mu kele bakala ya kukula, mpe mu fwana kwenda awa, mosi ya bilumbu yayi. Mpe mu fwana pesa mvutu na Kilumbu ya Lusambusu samu na yina mu ke na kutuba na nkokila yayi to ntangu nyonso yankaka. Mpe munu, samu na yawu, mu fwana kufwa ya kukwikama mpe kieleka ya kundimisa.

⁵⁴ Kasi, beno kota na dibuundu, mpe kana beno tala mbote nkadulu ya dibuundu yango, beno tala kaka mbote pasteur mwa ntangu fyoti, mpe beno ke tala na bunene ti dibuundu ke salaka mutindu pasteur. Bantangu yankaka, mu ke kumiyufulaka kana kaka ve beto ke kuzwaka mpeve ya mosi na mosi na

kisika ya Mpeve-Santu. Beno kwenda na kisika kisika pasteur kele kieleka landila misiku mpe ya kyese mingi, beno ke tala dibuundu kele mutindu mosi. Mu ke nata beno na dibuundu kisika mu monaka pasteur kutelama, kuningisa yintu na manima mpe na ntuala. Beno tala mbote dibuundu, bawu ke sala kima mutindu mosi. Beno baka pasteur, yina ke minaka kaka nyonso, na ntangu nionso dibuundu ke sala mutindu mosi. Na yawu, kana mu vwandaka sola dibuundu, mu ke sola ya kieleka, ya kukangama na masonuku, Nsangu ya mbote ya Muvimba, dibuundu ya Biblia, kana mu vwandaka sola mosi samu na kutula dibuta ya munu. Sola. Mu talaka . . .

⁵⁵ Bana ya babakala, kilumbu yina, mwana ya bakala ya Mpangi Shakarian mpe bakala ya mwana ya yandi, kunataka munu na zulu awa samu na kusambila samu na ntwenya mosi ya bakala, muyimbi, mwana mosi ya bakala ya mbote. Kaka yina mu me katuka . . . Fred Barker, yina vwandaka nkumbu ya yandi, kaka yina mu me katuka na nzyetolo. Mpe ba me bokila munu, ti, “Fred vwanda kufwa.” Mpe dyaka, ntete mu kuma na yinzo, nsangu yankaka me kuma, “Yandi lenda kufwa kaka ntangu yayi.” Mpe yandi tubaka yandi vwandaka na hémorragie cérébrale, mpe yandi kumaka kikata, mpe—mpe yandi vwanda kufwa, mpe kento ya yandi zolaka ti mu sambila samu na yandi.

⁵⁶ Mpe mu banzaka, “Oh, kana mu meka na kubaka mpepo, yandi ke kufwa ntete mu kuma kuna, mpe lendaka vwanda ya kufwa ntangu yayi.” Na yawu, mu bokilaka na nswalu mpe kuzwaka mama yango ya ntwenya na alo-alo. Mpe—mpe beto me tula alo-alo, mpe na dikutu ya Fred. Yandi vwanda lenda ve kumina. Ba vwanda pesa yandi ya kudya na nzila ya bima ya kindele. Mpe na yina beto sambilaka samu na yandi, yandi tubaka, salaka, ti ba katula yawu na laka ya yandi. Yandi vwanda lenda kumina. Badokotolo kukwikilaka yawu ve. Ba katulaka yawu, mpe yandi vwanda lenda kumina. Kilumbu yankaka yina, yandi vwandaka ya kuvwanda mbote.

Dibuundu; nsodolo ya dibundu.

⁵⁷ Ntama mingi, ba vwanda me bokila na alo-alo. Na suka yayi, muntu mosi ya dibuundu ya munu, yina kele Baptiste ya kieleka na Louisville, yandi vwanda me kufwa na suka yayi. Mpe dibuundu ya munu na yinzo, nkonga ya kieleka ya bantu yina ba me byadisaka, kuvukanaka bawu mosi kintwadi mpe kwendaka kuna, ntete bantu ya yinzo ya bamvumbi kubaka yandi, ba telamaka na lweka ya yandi, me sambilaka tii luzingu kuvutukaka na kati ya yandi. Mpe yandi kele moyo, na nkokila yayi. Bakuluntu ya dibuundu ya munu, samu na yinki, ba longisaka bawu na kukwikila ti bima nyonso lenda kusalama, me kwiza na Nzambi ya kusungama.

Na yawu, beno fwana sala nsodolo ya mbote.

⁵⁸ Na kubwela, mutindu ya kento yina bakala ke sola, ke lakisa balukanu mpe kikalulu ya yandi. Kana bakala kusola kento ya yimbi, ya ke lakisa kikalulu ya yandi. Mpe na yina yandi ke na kukangamaka yandi mosi, ke lakisa kieleka yina kele na kati ya yandi. Kento ke lakisaka yina kele na kati ya bakala ntangu yandi ke sola yandi mutindu kento. Ya ke lakisa yina kele na kati ya yandi. Ata nyonso yina yandi ke tuba na ngaanda, beno tala mbote yina yandi me kwela.

⁵⁹ Mu kwenda na bilo ya muntu, mpe yandi tuba ti yandi kele Muklisto; ba-pinup bisika nyonso na zulu ya bibaka, muziki ya ntama ya boogie-woogie ke na kulutaka. Mu ke kipe ve yina yandi ke tuba. Mu ke kwikila ve kimbangi ya yandi, samu ti mpeve ya yandi ke na kuzwaka ya kudya na bima yayi ya yinza. Beto, tuba ti, kana yandi kwela kento yina ke binaka music-hall, to yinki kana yandi kwela ntinu ya kento yina zola kuvukisa banzutu, to kaka ricketta ya kitoko, ya bubu yayi? Ya ke talisa kima, ya ke lakisa yina yandi kele na yawu na kati ya dibanza ya yandi, yina yinzo ya yandi ya ntwala ke vwanda, samu ti yandi me baka yandi samu na kudikisa bana ya yandi. Mpe yina yandi kele, ya kele mutindu yandi ke kudikisa bana yango. Na yawu, ya ke lakisa yina kele na kati ya bakala yango. Bakala yina ke baka kento mutindu yina, ke lakisa kaka yina yandi ke na kubanzaka samu na bilumbu ya ntwala.

⁶⁰ Beno lenda banza Muklisto kusala kima mutindu yina? Ve, tata. Mu lenda ve. Muklisto ya kieleka ke tala ve na bantinu yango ya kento ya kitoko, mpe bakento yina ke binaka music-hall, mpe bantinu ya bakento yina zola kuvukisa banzutu na babakala. Yandi ke tala na kikalulu ya Muklisto.

⁶¹ Ntangu yayi, beno lenda ve kuzwa bima nyonso, ya lendaka vwanda na mwana mosi ya kento yina kele kieleka kitoko, mpe mwana ya kento yankaka yina, na kutala yandi kele, ntela ya yandi ke talana ya kulutila mbote na yandi *yayi*, mpe beno fwana lutisa mutindu munkayulu mosi samu na yankaka. Kasi kana yandi kele ve na ntela ya mama, to ya kento, mpe yandi kele. . . Mu ke kipe ve kana yandi kele kitoko to ve, beno fwana tala na kikalulu ya yandi, kana yandi kele kitoko to kitoko ve.

⁶² Ntangu yayi, samu, ya kele, kana Muklisto zola kusola kento, yandi fwana sola kento ya kieleka, ya kubutuka ya mbala zole, ata mutindu yandi ke talana. Ya kele yina yandi kele, ya kele yina ke salaka yandi. Mpe kuna, dyaka, yina ke lakisa kikalulu ya kinzambi ya yandi, mpe ke lakisa yina kele na kati ya dibanza ya yandi mpe yina ke vwanda na bilumbu na ntwala, samu ti mutindu ya kento yina ke vwanda yina ke yundula dikanda ya yandi, samu na makani ya bilumbu na ntwala ya yinzo ya yandi.

⁶³ Kana yandi kwela mosi ya mwa ba-ricketta ya bubu yayi, bantinu ya bakento yina zola kuvukisa banzutu na babakala, yinki yandi ke vingila? Wapi mutindu ya yinzo bakala lendaka

vingila na kuzwa? Kana yandi kwela mwana ya kento yina kele na nkadulu ya buzitu mingi ve samu na kuvwanda na yinzo mpe ke kipe yinzo, mpe ke zola kukwenda sala na bilo ya muntu, wapi mutindu ya kisadi ya yinzo yandi ke vwanda? Beno ke kuzwa ba baby-sitters mpe nyonso yankaka yina. Ya kele kieleka.

⁶⁴ Ntangu yayi, mu ke zolaka mingi ve mutindu ya bubu yayi, ya bakento yina ke salaka. Ntangu mu monaka bakento yayi ya kulwata ba-uniforme, na kutambulaka bisika nyonso na kati ya mbanza yayi, na zulu bamoto, mutindu bapulusu, ya kele nsoni na konso mbanza yina ke bika kento kusala yawu. Beno me mona? Beno me mona? Na yina babakala mingi kele kukondwa bisalu, ya ke lakisa bangindu ya bubu yayi ya mbanza ya beto. Ya ke lakisa kubeba. Beto fwana kuzwa bakento yina kuna mutindu yina ve. Ba kele na kima ve ya kusala kuna mutindu yina.

⁶⁵ Ntangu Nzambi pesaka bakala kento, Yandi pesaka yandi kima ya kulutula mbote yina Yandi lendaka kupesa yandi, na manima ya mpulusu. Kasi ntangu mosi ke kwenda samu na kumeka na kubaka kisika ya bakala, kuna yandi kele na kutala ya kulutula kima ya yimbi na yina yandi zolaka kuzwa. Ntangu yayi, ya kele kieleka. Beno mona?

Ntangu yayi beto lenda mona kutula ya yawu na kimpeve.

⁶⁶ Mu—mu zaba ti ya kele yimbi, beno ke banza ti ya kele yimbi, kasi ya kele Kieleka. Beto ke kipe ve mutindu yimbi ya kele, beto fwana kundima dyambu. Ya kele yina Biblia ke longa beto. Beno me mona?

⁶⁷ Ntangu yayi, beto ke na kumona pwelele awa dikani ya kimpeve, ya dikani ya Nzambi ya Yinzo ya Yandi na bilumbu ya ntwala na Kento ya Yandi ya makwela ya ntwala, kotalana ntangu yayi.

⁶⁸ Kana bakala kukwela ntinu ya kento yina zola kuvukisa banzutu, beno ke mona yina yandi ke na kusosa samu na bilumbu ya ntwala. Kana bakala kukwela kento yina zola ve kuvwanda na yinzo, beno ke mona yina yandi ke na kusosaka samu na bilumbu ya ntwala. Mpe munu kilumbu mosi . . .

⁶⁹ Yayi ke pesa boma. Mu ke kaka na nsatu ya kutuba yawu. Mpe mu—mu, na konso ntangu, kana mu zola kutuba kima, mu fwana tuba yawu. Mpe ya kele na konso ntangu mutindu ya Nzambi.

⁷⁰ Mu—mu vwanda kwendaka na mfumu ya ranch yina vwandaka sala na munu, na kwenda kusumba bibulu. Mpe mu vwandaka tala muntu ya kukula yayi ntangu nyonso kutala kaka na kizizi ya mwana ngombe ntete yandi solula ntalu. Kuna yandi ke balula yintu ya yandi, mpe ke tala na manima mpe nyonso yina. Mu vwanda landaka yandi nzila nyonso, na kotalaka yandi mbote. Mpe yandi vwanda tala yandi na zulu mpe na yisi, kana yandi vwanda talana nyonso mbote, ntela. Na manima yandi ke

baluka mpe ke tala yandi na kizizi, mpe bantangu yankaka yandi ke ningisa yintu ya yandi mpe ke kwenda.

Mu tubaka, “Jeff, mu zola kuyufula nge kima.”

Yandi tubaka, “Tuba, Bill.”

⁷¹ Mpe mu tubaka, “Samu na yinki nge ntangu nyonso ke talaka ngombe ya kento yina na kizizi?” Mu tubaka, “Yandi ke talana nyonso mbote, ngombe ya kento ya mbote—mbote ya mafuta.”

⁷² Yandi tubaka, “Mu zola kutuba na nge, mwana, nge ke na mingi ya kulonguka.” Mpe mu—mu bakulaka yawu na manima yandi tubaka na munu. Yandi tubaka, “Mu ke kipe ve mutindu yandi kele ya kusala. Yandi lenda vwanda mbote na nsuni, tii na dikulu. Kasi kana yandi kele na kutala ya makasi na kizizi ya yandi, kusumba yandi ata fyoti ve.”

Mu tubaka, “Samu na yinki mutindu yina, Jeff?”

⁷³ “Mbote,” yandi tubaka, “kima ya ntete kele,” yandi tubaka, “ata mbala mosi ve ti yandi ke vwanda kisika mosi.” Mpe yandi tubaka, “Kima yankaka kele, yandi ke vwanda ata mbala mosi ve mama samu na mwana ya yandi.” Mpe yandi tubaka, “Ba me tula yandi na kati ya lupangu ntangu yayi, ya kele samu na yina yandi kele nene. Nge bika yandi pwelele, na kutala yina ya makasi, yandi ke kima tii kufwa.”

⁷⁴ Mu tubaka, “Nge zaba, mu na kutala me longuka kima. Mu banza ti ya ke tulama na bakento, mpe.” Kieleka. Kieleka.

⁷⁵ Kutala yina, ya makasi, yina ke talaka ricketta, ya ke vwanda mbote ti beno vwanda ntama ya yandi, bakala, nyonso yina ya kima ya blue na zulu ya meso ya yandi. Mpe mu ve . . . Mu ke zola yawu ve. Mu banza ve ti ya kele ya kulunga samu na Muklisto. Mu ke kipe ve lutangu ya baluzabusu ya televizyo mpe zulunale ke tuba ti ya kele kitoko. Ya kele ntalulu ya kulutula boma, kimpa ya yimbi yina mu me monaka ntete na luzingu ya munu.

⁷⁶ Ntangu mu monaka yawu mbala ya ntete, awa na Cafétéria Clifton, na suka mosi, na madia ya suka. . . Mu monaka mwa bantwenya ya bakento kukwiza. Mpangi Arganbright vwandaka me kota kaka, mpe munu. Mpe yandi kwendaka na yisi ya bikalu. Mpe mu talaka, mpe mwana ya kento yina kukotaka. Mu banzaka, “Mbote, mu—mu—mu—mu zaba ve.” Mu monaka yawu ata fioti ve. Ya vwandaka mutindu mosi. Oh, ya talanaka mutindu yandi vwanda pola, beno zaba, kaka mutindu ya kubaluka. Mu—mu ke na kutuba yawu ve samu na kusekisa, mu ke—mu ke na kutuba yawu samu. . . Beno zaba, mu me monaka lèpre, mu kele missionnaire, Mu me monaka mitindu nyonso ya bifu, beno zaba, ya mutindu. . . bimbevo, mpe mu zola belama na ntwenya ya kento mpe kutuba na yandi, “Mu—mu—mu kele longi, mu—mu ke sambilaka samu na bambevo. Nge ke—ke zola munu kusambila samu na nge?” Mpe mu monaka ntete ve kima

mutindu yina. Mpe kuna, awa me kota zole to tatu dyaka, na kati. Mu me sala mutindu kuvutuka manima kuna mpe me vingila.

⁷⁷ Mpe Mpangi Arganbright me kwiza, na yawu mu tubaka, “Mpangi Arganbright?” Yandi lenda vwanda awa. Mu tubaka, “Wapi dyambu kele na kento yina?” Beno me mona?

Mpe yandi tubaka, “Yina, ya kele fard.”

⁷⁸ Mu tubaka, “Mbote, oh, oh!” Beno me mona? Mu banzaka ba fwana kuzwa yandi na yinzo ya bantu ya kubela kisika, beno zaba, samu na kubumba ti yawu kutsyamuka na zulu ya bakento nyonso yankaka.

⁷⁹ Kasi, beno zaba, beno fwana sala dikani, kutala, kusambila, ntangu beno ke na kusola. Samu, beto ke mona, na nzila ya yayi, Ndinga ya nsilulu. Yandi, kento ya makwela yina bakala ke sola, ke lakisa kikalulu ya yandi. Ya ke lakisa yina kele na kati ya yandi.

⁸⁰ Ntangu yayi, beno lenda banza ti bakala, ya kufuluka na Mpeve-Santu, ke baka kento kima mutindu yina? Mu—mu—mu ke mona kaka yawu ve, mpangi. Ntangu yayi, ya lendaka vwanda ti mu kele kaka kiboba ya kilawu. Kasi, beno zaba, mu—mu lenda kaka ve kubakula yawu, beno me mona, beno tala, samu ti ya ke lakisa yina kele na kati ya yandi. Yandi ke sadisa yandi na kusala yinzo ya yandi ya bilumbu ya ntwala.

⁸¹ Ntangu yayi, na yina, ti beto vutuka mwa ntangu fyoti awa, na lweka ya kimpeve. Mpe ntangu beno ke mona dibuundu yina kele na kati ya yinza, ke sala mutindu yinza, ke sepela na yinza, ke kota na kisalu ya yinza, ke tanga Misiku ya Nzambi mutindu kana Yandi kusonikaka Yawu ata mbala mosi ve, kuna beno—beno lenda kaka kutala ti Klisto ke baka Kento ya makwela ya mutindu yina ve. Beno lenda banza ti kubaka dibuundu ya bilumbu yayi mutindu Kento ya makwela? Mfumu ya munu ve. Mu ve. . . Na mpasi mu lenda mona yawu. Ve. Beno bambuka moyo, ntangu yayi, bakala na kento ya yandi kele muntu mosi. Beno lenda vukana beno mosi na muntu ya mutindu yina? Kana beno sala yawu, kieleka ya ke sala mutindu ya kunyongisa lukwikilu ya munu na beno.

⁸² Mpe, kuna, wapi mutindu Nzambi ke vukana Yandi mosi na kima mutindu yina, ndumba ya dénomination ya ntangu nyonso? Beno banza ti Yandi ke sala yawu, “Ke lakisa mutindu ya kinzambi kasi ke manga ngolo ya yandi?” Yandi ke sala yawu ata mbala mosi ve. Kento fwana kuzwa kikalulu ya Yandi na kati ya yandi. Dibundu ya kieleka, ya kieleka, yina me butuka mbala zole fwana kuzwa kikalulu yina vwandaka na kati ya Klisto, samu ti bakala mpe kento kele muntu mosi. Mpe kana Yesu kusalaka kaka yina sepelisaka Nzambi, kangamaka na Ndinga ya Yandi mpe talisaka Ndinga ya Yandi, Kento ya Yandi ya makwela fwana vwanda ya kikalulu ya mutindu mosi. Yandi ke lenda ve, na mutindu nyonso, kuvwanda dénomination. Samu ti,

na yina, ata mutindu beno ke zola kutuba, “ve,” yandi kele ya kuyala na kimvuka mosi kisika, yina ke tuba na yandi yinki ya kusala mpe yinki yandi lenda ve kusala, mpe, bambala mingi, ya kele fuku ya ba-mille ya Ndinga ya kieleka.

⁸³ Ya kele yimbi mingi ti beto kwendaka kwandi ntama na Ntwadisi ya kieleka yina Nzambi bikilaka beto na kutwadisa Dibuundu. Ata mbala mosi ve ti Yandi fidisaka mikengi ya nene. Ata mbala mosi ve ti Yandi fidisaka ba-evêque, ba-cardinale, banganga-Nzambi, ba-pape. Yandi fidisaka Mpeve-Santu samu na Dibundu, samu na kutwadisa Dibuundu. “Ntangu Yandi Mpeve-Santu ke kwiza, Yandi ke twadisa beno na kati ya Kieleka nyonso, ke talisa bima yayi na beno, yina mu tubaka na beno, ke bambula beno yawu moyo, mpe ke lakisa beno bima yina ke na kwiza.” Mpeve-Santu zolaka sala yawu. Ntangu yayi, dibuundu ya bubu yayi zola Yawu ve. Ba zola Yawu ve, na yawu wapi mutindu yandi lenda vwanda Kento ya makwela ya Klisto? Bantu ya bubu yayi ke na kusolaka dénomination ya bilumbu yayi. Yinki ya ke sala, ya ke lakisa kaka lubakusu ya bawu ya Ndinga ya mputu.

⁸⁴ Mu zola kunyongisa ve, kasi mu zola kunata yawu na kati mingi tii beno ke tala yawu.

⁸⁵ Mu me kwelisaka bantu mingi, kasi konso ntangu ya ke bambulaka munu moyo na Klisto mpe Kento ya Yandi ya makwela. Mosi ya makwela yina mu salaka awa, mwa bilumbu me luta, ya—ya vwandaka kima yina kangamaka na luzingu ya munu. Ya kele bamvula mingi me luta, ntangu mu vwandaka kaka ntwenya ya longi.

⁸⁶ Mpangi ya munu ya bakala vwandaka sala na PWA. Mu zaba ve kana muntu me bambuka kwandi dyaka, moyo na yawu, to ve, muntu ya kukula mutindu munu. Mpe ya vwandaka dikani yina luyalu kuzwaka. Mpe mpangi ya munu ya bakala vwandaka sala kuna, pene ya bakilometele makumi yiya na nana. Ba vwanaka timuna mwa badizanga, dikani samu na kubumba.

⁸⁷ Mpe ya vwandaka na mwana mosi ya bakala yina vwanaka salaka kuna, na yandi, yina katukaka Indianapolis, pene, oh, pene ya bakilometele nkama na makumi sambanu na zulu ya Jeffersonville kisika mu—mu ke zinga, to ke zingaka. Mpe kuna vwandaka . . . Yandi tubaka na mpangi ya munu ya bakala, kilumbu mosi, yandi tubaka, “Doc,” yandi tubaka, “Mu—mu zola . . . Mu ke kwelana, kana mu kuzwaka kaka mbongo ya kulunga samu na kufuta longi.” Yandi tubaka, “Mu—mu ke na mbongo ya kulunga samu na kuzwa lisanse, kasi,” yandi tubaka, “Mu ke na mbongo ya kulunga ve samu na kufuta longi.”

⁸⁸ Doc tubaka, “Mbote, mpangi ya munu ya bakala kele longi, mpe—mpe yandi—yandi lenda kwelisa beno.” Yandi tubaka, “Yandi ke futisaka bantu ve samu na bima mutindu yina.”

Yandi tubaka, “Nge zola kuyufula yandi kana yandi lenda kukwelisa munu?”

⁸⁹ Mbote, na nkokila yina mpangi ya munu ya bakala yufulaka munu. Mu tubaka, “Kana yandi me kwelanaka ntete ve, to mosi ya bawu, mpe ti bawu kele. . . nyonso kele mbote.”

Yandi tubaka, “Mbote, yinga, mu ke yufula yandi.”

Mpe mu tubaka, “Kana ya kele mutindu yina, tuba na yandi, na kwiza.”

⁹⁰ Na yawu, ntangu Kilumbu ya sambanu kukumaka mpe mwana yango ya bakala kwizaka. Ya me vwanda kima ya nene samu na munu, na vutukila ntangu nyonso na zulu ya yayi. Mu. . . Manima mosi ya midi ya kilumbu ya mvula, mpe ditoma mosi ya Chevrolet ya ntama, na minda ya kusimba na bisengo, kunatamaka, na ntuala ya yinzo. Kaka ntangu mingi ve na manima mu me zimbisa kento ya munu, mu vwanda zinga munu mosi, na mwa bivinga zole. Mpe—mpe Doc vwanda kuna na munu, na kuvingilaka bawu.

⁹¹ Mpe—mpe mwana mosi ya bakala me basika na ditoma, mpe kieleka yandi vwanda talana ve mutindu bakala ya makwela, na munu, to na muntu nyonso, mu banza. Yinga. Mu zolaka sumba mapapa ya kitoko mingi, ya dollar mosi na ndambu. Mpe yandi vwanda ya kuvwata dipapa, yina vwanda ya kubeba. Mpe pantalon ya yandi vwandaka kieleka nene. Mpe yandi vwanda ya kuvwata mosi ya bakazaka yayi ya ntama ya velour ya coton. Mu banza ve ti bayankaka ya beno bantu ya kukula lenda bambuka moyo. Ya vwanda talana mutindu ya me basika na masini ya kusukula bilele kukondwa kusukula yawu na masa ya mbote, mpe ya vwanda na ba-trainé, ya kukangama mutindu *yayi*, mpe nsongi na zulu.

⁹² Mpe mwa- kento me basika na lweka yankaka, na mwa, oh, mosi ya mwa robe ya bawu ya ba-carreau.

⁹³ Mu zaba ve. Mu salaka foti kilumbu mosi, mutindu mu kubokilaka lele yango. Vichy, mu banza ya kele mutindu yina ba ke bokila yawu. Mpe kuna ya vwandaka. . . [Dibuundu me seka—Mu.] Mu me tuba dyaka yawu yimbi. Mu—mu ntangu nyonso ke salaka yawu. Mpe mu tubaka. . .

⁹⁴ Yandi me basika na ditoma, mpe bawu me mata bimatinu. Mpe—mpe ntangu ba belamaka, mwa kima ya mawa, kento. . . Mu banza, yandi, kaka na kutala nyonso yandi lwataka vwandaka jupe. Mpe yandi na kutuba, kuzwaka mapapa ve, ya kulwata. Yandi katukaka Indianapolis, na kusalaka auto-stop. Yandi vwandaka na mwa nsuki ya kubwa, na manima, ya yinda, mutindu ya bansuki yina ke kubwaka na manima ya kento. Yandi vwandaka na kutala kaka ntwenya.

Mpe mu tubaka na yandi, “Nge kele na mvula ya kulunga samu na kukwelana?”

95 Yandi tubaka, “Yinga, tata.” Mpe yandi tubaka, “Mu ke na muswa ya kusonama ya tata mpe mama ya munu.” Yandi tubaka, “Ya lungaka ti mu lakisa yawu na—na yinzo ya lusambusu awa, samu na kuzwa licence ya munu.”

96 Mu tubaka, “Mbote mingi.” Mu tubaka, “Mu zola kuzonza na beno mwa fyoti ntete beto sala makwela yayi.” Bawu me vwanda na yisi. Mwana ya bakala vwanda tala kaka bisika nyonso na kivinga; kieleka yandi vwandaka na nsatu ti ba zenga yandi nsuki. Mpe yandi vwanda tala kaka bisika nyonso na kivinga. Yandi vwanda kuwa munu ve. Mu tubaka, “Mwana, mu zola ti nge kuwa yina mu ke na kutuba.”

Yandi tubaka, “Yinga, tata.”

Mpe mu tubaka, “Nge zola mwana ya kento yayi?”

Yandi tubaka, “Yinga, tata. Mu zola yandi.”

Mu tubaka, “Nge zola bakala yayi?”

“Yinga, tata. Mu zola yandi.”

97 Mu tubaka, “Ntangu yayi, nge ke na kisika ya kunata yandi na manima beno me kwelana?”

Yandi tubaka, “Yinga, tata.”

98 Mu tubaka, “Mbote mingi. Ntangu yayi,” Mu tubaka, “Mu zola kuyufula nge kima. Mu me kuwa, nge ke kusalaka awa na PWA.”

Mpe yandi tubaka, “Yinga, tata.” Ya kele na kutala ba-dollar kumi na zole na sabala mosi.

Mu tubaka, “Nge banza ti nge ke lenda na kupesa yandi bansatu ya yandi?”

Yandi tubaka, “Mu ke sala nyonso mu lenda sala.”

99 Mpe mu tubaka, “Mbote, ya kele mbote mingi.” Mpe mu tubaka, “Ntangu yayi, yinki kana yandi. . . Yinki kana yandi kuvwanda dyaka ve na kisalu yayi, mpangi ya kento? Yinki nge ke sala, ke vutuka na mbangu na yinzo, ya mama, na papa?”

Yandi tubaka, “Ve, tata. Mu ke vwanda na yandi.”

100 Mpe mu tubaka, “Yinki, tata, kana beno me kuzwa bana tatu to yiya, kima kele ve samu na kudikisa bawu, mpe nge ke na ata kisalu. Yinki nge ke sala, kuvutula yandi?”

101 Yandi tubaka, “Ve, tata. Mu ke nwana kaka. Beto ke lenda, na mutindu nyonso.”

102 Mu kutalanaka fyoti. Mpe mu monaka ti yandi zolaka yandi ya kieleka, mpe ti ba zolasanaka mosi na mosi. Mu kwelisaka bawu.

103 Na manima mu kumiyufulaka kisika yandi nataka yandi. Na manima ya bilumbu fyoti, mu yufulaka mpangi ya munu ya bakala, Doc, kisika ya vwandaka. Yandi tubaka, “Kulumuka na New Albany,” mwa mbanza na yisi ya beto.

¹⁰⁴ Mpe na yisi ya nzadi, kisika mu vwanda ya kutula mwa dinzanza, kisika mu vwanda kwendaka konso kilumbu ntangu mu—mu vwanda monteur ya bansinga. Na yawu ntangu bayankaka ya babakala, bawu vwanda vwanda kintwadi, ke sala bakusakana mpe bima, Mu vwanda kotaka na tomabilu mpe kukwenda na nzadi mpe kusambila ntangu yina, na kati kuna, mpe kutanga Biblia ya munu, na yisi ya kitini ya dinzanza ya nene kisika vwanda vwanda kompani ya ntama ya bisengo. Kuna ya vwandaka na bikunku ya ba-wagon ya ntama ya bima.

¹⁰⁵ Mpe mwana ya bakala yayi kwendaka kuna mpe kuzwaka mosi ya ba-wagon yango ya bima mpe salaka mwelo na scie. Mpe kuzwaka mukanda ya zulunale mpe na ba-buton punaise.

¹⁰⁶ Bantu yikwa zaba yina kele buton-punaise? Ya kele na ata muntu ya Kentucky awa, na yina. Ya kele, kubaka kitini ya carton, beno kotisa na yawu punaise, mwa fyoti. Mpe kuna beno kotisa yawu na kati. . . Yina kele buton-punaise.

¹⁰⁷ Na yawu, ba tulaka yawu bisika nyonso. Mpe yandi kwendaka kuna na kompani ya bisengo mpe kuzwaka kima mosi, mpe salaka kimatinu, samu na kumata. Mpe kuzwaka mwa basanduku ya ntama, mpe salaka mesa. Mpe kilumbu mosi, mu banzaka, “Mu ke kwenda kuna mpe ke mona mutindu bawu kele.”

¹⁰⁸ Pene ya bangonda sambanu ntete yina, mu kwelisaka mwana ya kento ya E. V. Knight na mwana ya bakala ya E. T. Slider. E. V. Knight, mosi ya bantu ya bimvwama yina kele kuna na Ohio River, mpe, oh, yandi ke twadisaka bakompani ya nene kuna, ke salaka bayinzo ba me yidikaka yimeni, mpe nyonso yina. Mpe—mpe Slider, E. T. Slider, kele na kompani ya zyelo mpe matadi ya fyoti, bana ya bantu ya mbongo. Mpe mu kwelisaka bawu.

¹⁰⁹ Mpe mu kwendaka kisika mosi, mu vwanda sala yawu pene ya basabala zole, mpe kuvutuka na kati ya kivinga ya bwatu mpe kufukama na kuse. Mpe nyonso ya bima ya nfunu mpe nyonso yina mu lutilaka kwandi, pene, ya lungaka ti mu lutila na yawu, samu na kukwelisa bantu yina! Mpe ntangu ba vutukaka, mbote, ba vwandaka. . . Mwa bantu zole yankaka yayi kutelamaka kaka kuna na mwa kivinga ya ntama kisika beto vwanda na mwa kiti ya bibombi mpe mbeto yina ba ke bukaka, kasi bawu nyonso zole kukwelanaka na mutindu mosi ya nkinzi.

¹¹⁰ Mpe kuna, kilumbu mosi, mu banzaka mu ke kwenda kuna mpe kutala bantu zole ya kukwelana yayi. Ba zolaka sala ve, batata ya bawu vwandaka bantu ya mbongo, tungilaka bawu yinzo ya kitoko. Na mutindu ya kieleka, E. V. Knight yayi, na zulu, awa ya mongo, maboko ya bamwelo ya yinzo ya yandi ya nene ya bumfumu kele ya ba-carat kumi na yiya, na yawu beno lenda banza na wapi mutindu ya yinzo ba ke zingaka. Ba zolaka sala ve. Ba vwanda kuzwa konso mvula Cadillac ya mbote ba vwanda pesa bawu. Mpe kaka, kaka bana, mpe ba vwanda

kuzwa kaka nyonso yina ba vwanda zola. Ntangu mu belamaka kilumbu mosi. . .

¹¹¹ Ntangu yayi, wapi mutindu mu zabaka bawu, mosi ya bankundi ya bawu vwandaka nkundi ya munu ya mbote. Beto nyonso na kutala wandaka bankundi. Mpe ya kele mutindu mu zabaka bawu, ntangu ba zolaka ti mu kwelisa bawu.

¹¹² Na yawu mu kwenda kuna samu na kutala bawu. Mu me basika na Ford ya munu ya ntama yina, na ngaanda, mpe me mata bimatinu. Mpe—mpe ntangu mu kumaka na zulu, mwa pene-pene mingi, mpe mu vwanda kuwa bawu. Mpe kieleka ba vwanda swana. Ba vwanda sala mosi na mosi kimbanda. Ba kwenda na kubina. Yandi vwandaka kieleka mwana mosi ya kento ya kitoko. Mpe yandi vwandaka mutindu ya mosi ya bantinu ya kento yayi ya boté. Yandi kuzwaka bantalu mingi bisika nyonso kuna, mpe nungaka mwa matoma mpe bima, samu na kuvwandaka ntinu ya kento ya kitoko. Mpe mu vwanda tala bawu, mpe mosi vwandaka ya kuvwanda na nsongi mosi mpe yankaka na yankaka, ke na swanaka samu yandi binaka na mwana mosi ya bakala, to mwana mosi ya kento, kima mutindu yina.

¹¹³ Ntangu mu me belama, ba me dumuka na nswalu-nswalu mpe me simbasana mosi na mosi na yisi, mpe maboko ya bawu—ya bawu, na yisi, ke na kwiza na ntuala ya mwelo. Ba tubaka, “Oh, mbote kuna, Mpangi Branham! Yinki mutindu mavimpi?”

Mu tubaka, “Mbote. Yinki mutindu mavimpi beno zole?”

¹¹⁴ Mpe, “Oh,” bakala tubaka, “Mu—mu. . . Beto kele kieleka mbote. Mutindu yina ve cherie?”

Mpe kento tubaka, “Yinga, cheri.” Beno me mona?

¹¹⁵ Ntangu yayi, beno me mona, beno ke kutula kima yina kele ya kieleka ve. Ntangu yayi, beno lenda ve kuzwa tiya na nzila ya kifikulu, mutindu bayankaka ya mabuundu ke mekaka na kufikula pantekote, ya kima yina kusalamaka difunda ya bamvula me luta to mafunda zole ya bamvula me luta. Beno lenda kuzwa tiya ve na nzila ya kifikulu ya tiya. Pantekote kele kaka kieleka mutindu bubu yayi na yina ya vwandaka kuna. Beno me mona? Yinga. Tiya ke na kubwa dyaka. Ya kele ve tiya ba me fikula. Ya kele Tiya ya kieleka.

¹¹⁶ Na yawu, bawu, kaka kuna ba vwandaka. Beno me mona? Mu—mu ke zola ve kuzinga mutindu yina.

¹¹⁷ “Oh,” mu banzaka, “nge zaba, kaka na yisi kuna na kati ya matadi kuna mpe pene-pene ya nzadi, ya kele kisika bantu zole ya kukwelana yankaka yayi kwenda vwanda.” Mu banzaka, “Na Kilumbu ya sambanu mosi na manima ya midi mu ke kwenda kuna mpe kumona mutindu bawu kele.”

¹¹⁸ Na yawu mu, vwandaka na kizizi ya bunkete ve, mpe vwanda ya kulwata combinaison ya mvindu, bisalulu ya munu na munu.

Mu banzaka, “Mu ke kwenda kuta bawu.” Mu kumaka na malembe mutindu mu vwanda tala kana ba-isolateur vwandaka me beba na nzasi to kima, mpe na yina mu vwanda tambula nzila nyonso pene ya singa ya alo-alo, bisengo ya lutiliki nzila nyonso na nzadi. Mpe kuna vwandaka na Chevrolet ya ntama, ya kuvwanda na ntwala, kuna. Pene ya mvula na ntwala na manima mu me kwelisa bawu. Mpe kuna vwandaka. . . Mwelo vwandaka pwelele, mpe mu vwanda lenda kuwa bawu kuzonza. Na yawu yayi ke wakana mutindu muntu ya luvunu, kasi mu belamaka pene-pene mingi tii mu lendaka kuwa, kumona yina bawu vwandaka tuba. Mu telamaka kuna. Mpe Mu vwanda zola kaka kuzaba, yinki vwanda luta.

119 Mu ke zolaka kuzaba mpe kuvwanda ya kieleka mu kuzaba yina mu ke zonzila. Ya kele mutindu mu ke salaka samu na Ndinga ya Nzambi. Yawu kele Kieleka, to Yawu kele Kieleka ve? Yandi ke kangama na Ndinga ya Yandi, to Yandi ke kangama ve na Ndinga ya Yandi? Kana Yandi kukangama ve na Ndinga ya Yandi, kuna Yandi kele Nzambi ve. Beno me mona? Yandi ke kangamaka na Ndinga ya Yandi, Yandi kele Nzambi. Beno me mona?

120 Mpe samu na yawu mu vwanda zola kumona mutindu bawu vwandaka. Mpe mu me syelumuka nzila nyonso, kieleka na malembe. Mu kuwaka bakala kutuba, “Oh, cherie, mu vwanda zola mingi, kuzwa yawu samu na nge.”

121 Kento tubaka, “Ntangu yayi, tala, ya ntima.” Kento tubaka, “Robe yina kele mbote.” Kento tubaka, “Oh, ya kele kaka mbote.” Yandi tubaka, “Mu zolaka yawu mingi. Kasi nge me mona. . .”

122 Mu me syelumuka pene-pene, samu mu tala na nzila ya dibulu, kisika mwelo vwandaka pwelele kuna na wagon yango ya bima. Mpe kuna yandi vwandaka, ya kuvwanda na kati kuna, mpe kento na zulu ya makulu ya yandi; mpe diboko ya bakala na zulu ya kento, mpe diboko ya kento na zulu ya bakala. Mpe yandi vwandaka na mosi ya bayimpu ya ntama yayi ya bansongi ya nene, mpe salaka mwa dibulu, lalisaka yawu, zulu, mpe tulaka difuti ya yandi, na yawu. Yandi—yandi vwanda tula yawu na mesa. Vwanda tuba, “Yayi samu na madya. Yayi samu na assurance. Mpe Yayi samu na ditoma.” Mpe ba vwanda lenda ve na kulungisa ngonda ya muvimba. Mu bakulaka ti, bakala kumonaka mwa robe mosi kuna na nela mosi, vwanda tala yawu basabala zole, ya vwandaka dollar mosi na kima. Yandi vwanda zola kusumba yawu. Yandi tubaka, “Mbote, cherie, nge ke talana kitoko mingi na kati ya yawu.” Mpe bakala tubaka. . .

123 Kento tubaka, “Kasi, cheri, mu—mu ke na robe. Kieleka mu—mu ke na nsatu ya yawu ve.” Beno me mona? Mpe mwa ntinu ya kento yina. . .

124 Mpe mu me vutuka manima, mpe me tala na zulu. Mu lendaka kumona dikonga na zulu ya yinzo yankaka yina. Mu telamaka kuna mpe talaka, baminuti fyoti. Mu banzaka, “Nani kele muntu ya bimvwama?” Mu banzaka, “Kana, Bill Branham, kana nge zolaka sola mosi ya bisika, wapi kisika nge ke kwenda?” Samu na munu, mu ke baka ve kima yina ya kitoko na zulu ya mongo. Mu ke baka kikalulu yayi na yisi awa, mutindu kento ya yinzo ya kieleka, muntu yina ke zola munu mpe ke vwanda na munu, muntu yina ke meka na kusala yinzo; mpe muntu ve yina ke sala beno kubasisa mbongo na kima nyonso, samu na baboté; kasi muntu ke vwanda na beno, kitini ya beno.

125 Ntangu nyonso ya ke vwandaka na munu, na mutindu ya vwandaka. Mosi solaka kitoko ya mwana ya kento, yankaka yina solaka kikalulu. Ntangu yayi, ya kele kaka mutindu beno lenda sala kusola. Na ntete, beno tala na kikalulu; mpe na manima, kana beno zola yandi, mbote.

126 Beno tala, Adam ya ntete ya Nzambi kuzwaka nsodolo ve ya kusala, samu na kento ya yandi. Yandi kuzwaka nsodolo ve. Nzambi salaka kaka yandi mosi, mpe yandi zolaka sala kusola ya kento ve. Na yawu beto talaka ti yandi twadisaka yandi na kubaluka na Ndinga ya Nzambi. Yandi zolaka sambila ve samu na dyambu yango. Yandi—yandi—yandi kele ve mutindu beno mpe munu. Yandi kuzwaka nsodolo ve. Mpe dyaka, na kusalaka yina, yandi twadisaka yandi na kukatuka na ntelamanu ya yandi ya kusungama ya kuvwanda mwana ya bakala ya Nzambi. Mpe yandi salaka yawu na kulakisaka yandi mutindu ya kulutila ya bilumbu ya bubu yayi ya kuzinga, kima yina kieleka ba zolaka sala ve. Kasi kikalulu ya yandi kulakisaka ti yandi vwandaka yimbi. Mabanza mpe balukanu ya yandi vwanda kaka ya yimbi. Mpe salaka yandi kundima, na nzila ya mbanzulu, ti nsemo ya malu-malu ya bilumbu yayi yina yandi bakulaka, yina vwandaka ya kuswaswana na Ndinga ya Nzambi, vwandaka mutindu ya kulutila mbote samu na kuzinga.

127 Mpe bakento yikwa bubu yayi, mpe mutindu mosi, na babakala, yina lenda benda kento ya mbote na kukatuka na Nzambi, to kubenda ntama bakala ya mbote na kukwenda ntama na Nzambi, na kumekaka na kutuba na yandi, “Nsambulu yayi, nge yina kele muntu ya Pantekote, lukwikilu yina,” ba ke tuba, “oh, ya kele kima me luta, ya kele nsaka ya ntama, kukwikila na yawu ve.” Beno ke sala mbote na kusambila ngolo ntete beno kwela mwana ya kento yina, mu ke kipe ve mutindu kitoko yandi kele. Kima mosi samu na bakala.

128 Yandi lendaka na kundimisa yandi na kubika luzolo ya Nzambi mpe salaka yandi kusala kima yina yandi zolaka sala ve, mpe, na yina, nataka lufwa na muntu nyonso. Ya kele samu na yina Biblia me yimina yandi na kulongisa, to kulonga, to kusadila Ndinga ya Nzambi, na mutindu nyonso.

129 Mu zaba, mingi ya beno, bampangi ya bakento yina ke tubaka, “Mfumu me bokila munu na kulonga.”

130 Mu ke swana na beno ve. Kasi mu ke tuba na beno, Ndinga ke tuba ti beno ke sala yawu ve. “Yandi ke longisa ve, to ke baka ata kiyeka, kasi ke vwanda swi.”

“Mbote,” beno ke tuba, “Mfumu me tuba na munu na kusala yawu.”

131 Mu ke sala ata fyoti ntembe na yawu. Beno kuwaka Nsangu ya munu nkokila yankaka yina na yina me tala Balaam? Balaam kuzwaka ntete, lukanu ya pwelele ya Nzambi, “Kusala yawu ve.” Kasi yandi tatamanaka na kusakana bisika nyonso tii na nsuka Nzambi tubaka na yandi na kwenda kusala yawu.

132 Nzambi lenda pesa beno muswa ya kulonga. Mu me tuba ve ti Yandi me pesa ve. Kasi ya kele ve landila Ndinga ya Yandi ya ntete mpe dikani. “Samu ti yandi fwana vwanda ya kutumama, mutindu tubaka musiku mpe.” Ya kele kieleka. Na yawu, yandi fwana sala yawu ve.

133 Ntangu yayi, beno tala dyaka mutindu kento ya makwela ya yinza ke kifwanukusu ya kimpeve. Ndinga ke tuba, ti, “Ba salaka yandi samu na bakala, mpe ve bakala samu na yandi.”

134 Ntangu yayi mu ke zonzila, mpe samu, na baminuti fyoti, na zulu ya Kento ya makwela ya Klisto, kasi mu ke na kumeka na kulakisa beno bunene ya yawu.

135 “Ba salaka kento samu na bakala, kasi ve bakala samu na kento.” Ya kele samu na yina, na yisi ya misiku ya ntama, ti kuwela bakento mingi vwandaka ya kundima. Beno tala David ya kuvwanda kuna na bakento bankama tanu, mpe Biblia ke tuba, “Yandi vwandaka muntu landila ntima ya Nzambi.” Na bakento bankama tanu, mpe Salomon na funda mosi, kasi mosi ve ya bakento yango zolaka kuzwa bakala yankaka.

136 Beno kuzwa bande ya munu na zulu ya *Makwela Mpe Kufwa Makwela*. Ti, kuna na zulu ya mongo na Tucson, awa ntama mingi ve, mu vwandaka na zulu kuna vwanda sambila samu na yawu. Ba bikaka bana ya lukolo, na kutala Dikunzi yango ya Tiya kuzunga mongo mpe vwanda baka mutindu ya pasware, kuvutuka mpe kukwenda na ntwala, kumata mpe kukulumuka. Bantu pene awa zaba yawu, kuna, mpe monaka Yawu; mpe Yawu. . . ntangu Yandi tubaka na munu Kieleka na zulu ya bakuyuvu yina me tala makwela mpe kufwa makwela. Kana ya kele na lweka mosi ke kwenda mutindu *yayi*, mpe mosi ke kwenda mutindu *yina*, ya fwana vwanda na Kieleka kisika. Na manima ya Binyemo Sambwadi yango, Yandi me lakisa yinki vwandaka Kieleka ya yawu.

137 Beno tala, ntangu yayi, yandi zolaka ve kuzwa kana bakala mosi, samu ti, “Ba salaka kento samu na bakala, mpe ve bakala samu na kento.” Bankama nyonso tanu ya bakento vwandaka

kaka kento ya David, mpe ya vwandaka kifwanukusu. Ntangu Klisto ke vwanda ya kuvwanda na Kiti ya Mfumu na Millénium, Kento ya Yandi ya makwela ke vwanda muntu mosi ve, kasi ya ke vwanda makumi ya mafunda, Kento ya makwela, nyonso na Mosi. Mpe David vwandaka na bakento mingi, na yandi mosi, kasi kaka bawu nyonso kintwadi vwandaka kento ya yandi. Mutindu Nzutu ya muvimba ya mikwikidi kele Kento ya makwela ya Klisto, samu ti Yawu kele Yandi, kento. Yandi vwandaka Bakala. Ntangu yayi, ba salaka beto samu na Klisto. Ba salaka Klisto ve samu na beto.

¹³⁸ Ya kele yina beto ke na kumeka na kusala bubu yayi na babuku ya beto, ya kele kumeka na kusala Ndinga (yina kele Klisto) kulunga na beto, na kiska ya beto na kumeka na kusala beto mosi kulunga na Ndinga. Ya kele luswaswanu.

¹³⁹ Ntangu bakala ke sola mwana mosi ya kento na dikanda mosi, yandi fwana kutala na kitoko ve, samu ti kitoko ke vunaka. Mpe kitoko, kitoko ya yinza ya bilumbu yayi, ya kele ya dyabulu.

“Oh,” mu ke na kuwa muntu kutuba kuna, “sala keba awa longi!”

¹⁴⁰ Mu ke tuba ti bima yayi na zulu ya ntoto yayi, yina ba ke bokilaka kitoko, ya kele kieleka ya dyabulu. Mu ke lakisa beno yawu. Na yina, na nsemo ya kutala yayi, beto tala mbote Ndinga ya Nzambi ya santu, samu na kumona kana ya kele ya kulunga to ve. Mpe bayankaka ya beno bakento zola kuvwanda kitoko mingi! Beno mona kisika ya katukaka. Na mbandukulu, beto ke tala ti Satana vwandaka kitoko mingi tii yandi vunaka Bawanzio. Mpe yandi vwandaka Wanzio ya kulutula kitoko na bawu nyonso. Ya ke lakisa ti, ya kele ya dyabulu. Proverbes ke tuba, Salomon ke tuba, “Kitoko kele mpamba.” Ya kele kieleka. Disumu kele kitoko. Kieleka, ya kele. Ya ke bendaka.

¹⁴¹ Mu zola kuyufula beno, mpe kutuba kima na beno awa. Mu zola beno kutala, baminuti fyoti. Na bambandu nyonso na yinza, bandeke, bibulu, beto ke tala ti na luzingu ya bibulu, na bawu nyonso kukatula muntu, ya kele bakala yina kele kitoko, kasi kento ve. Samu na yinki yina? Beno tala na . . . Beno tala mbambi, bakala ya nene na bayintu ya yandi, kasi mwa mpunda kele na yawu ve. Beno tala nsusu ya kento, mwa, nsusu ya kento na matona-matona, mpe nsusu ya bakala na mapapu ya kitoko. Beno tala ndeke ya bakala mpe ndeke ya kento. Beno tala kivadangu colvert mpe kento ya yandi. Beno me mona? Mpe ya kele ve na mbandu na yinza, yina ba salaka, yina lenda vuna mpe kuvutuka yisi mutindu kento.

¹⁴² Ntangu yayi, mpangi ya kento, beno telama ve mpe beno basika ve. Beno vingila kaka tii beno ke kuwa nsuka ya Yayi. Beno me mona? Beno me mona?

¹⁴³ Ya kele na kima, ata kento ti kento, lenda vwanda na nkadulu ya kukondwa buzitu. Beno ke bokila yimbwa ya kento

“ndumba,” beno ke bokilaka ngulu ya kento “cochonne,” kasi, na nkadulu ya buzitu, ba kele na bankadulu ya kulutila na yina ndambu ya ba-star ya cinéma kele na ngaanda kuna awa. Ba lenda vwanda kima yankaka ve kasi nkadulu ya buzitu.

¹⁴⁴ Mpe ya vwandaka kento yina sobaka, samu na kubebisa. Ya kele kieleka. Beno me mona kisika kitoko ke nataka yandi? Ntangu yayi, ya kele samu na yina, bubu yayi, beto ke tala ti kitoko ya bakento ke na kubwelamaka. Beno baka Pearl Bryan, beno me monaka ntete foto ya yandi? Yandi zolaka vwanda na kitoko ya nene ya Amerika. Ya kele ve na mwana ya kento ya lukolo ya balukolo nyonso yina zolaka tula yandi na manima ya ndonga. Beno zaba ti ya fwana vwanda mutindu yina? Beno zaba ti Biblia zonzaka ti ya ke vwanda mutindu yina?

¹⁴⁵ Beno zaba ti kubwa kwizaka na nzila ya bakento na mbandukulu? Mpe kubwa . . .Nsuka ke manisa mutindu mosi, bakento ke twadisa mpe ke yala na zulu ya babakala, mpe nyonso yankaka yina. Beno zaba ti Masonuku ke tuba yawu? Beno zaba, kilumbu yina yandi lwataka bilele ya bakala, mpe zengaka nsuki ya yandi, bima nyonso yina kele ya kuswaswana na Ndinga ya Nzambi. Mpe beno zaba ti yandi ke monikisa dibuundu? Ntangu beno ke tala mbote yina bakento ke na kusalaka, beno ke mona yina dibuundu ke na kusalaka. Ya kele kaka kieleka. Ntangu yayi, ntangu yayi, ya kele kaka kieleka mutindu Ndinga ya Nzambi kele kieleka.

¹⁴⁶ Ata kento yankaka yina ba salaka yina lenda vutuka manima mutindu kento lenda. Mpe dyaka, na nzila ya yina, ba salaka yandi . . .

¹⁴⁷ Yandi vwandaka ve na kati ya ngidikulu ya ntete. Bakento nyonso yankaka kele na kati ya ngidikulu ya ntete: bandeke, bakala mpe kento; bibulu, bakala mpe kento. Kasi, na luzingu ya kimuntu, Nzambi salaka kaka bakala, mpe Yandi bakaka na yandi. Mpe kento kele kima yina ba me sala na manima ya bakala, samu ti Nzambi salaka ve kima ya mutindu yina. Beno tala mbote Masonuku. Kaka kieleka. Nzambi, ve, tata, na ngidikulu ya Yandi ya ntete. Ba tulaka kento kuna.

¹⁴⁸ Kasi kana yandi lenda kusimba yandi mosi mbote, wapi mutindu ya musendo yandi ke kuzwa kulutila bakala. Ba ke lutisa yandi na kuteza. Na nzila ya yandi kwizaka lufwa. Yandi zaba lufwa nyonso. Kasi kuna Nzambi balukaka mpe sadilaka mosi na kuvutula Luzingu dyaka; nataka Mwana ya Yandi ya bakala na nzila ya kento, mosi ya kutumama. Kasi kento ya yimbi kele ya kulutila yimbi; ya kele na kima ve yina lenda kuvwanda yisi mutindu yina.

¹⁴⁹ Cain, mwana ya bakala ya Satana, banzaka ti Nzambi zolaka ndima kitoko. Yandi ke salaka yawu bubu yayi. Cain vwandaka mwana ya bakala ya Satana. “Oh, ntangu yayi!” Beno ke tuba. Beto ke kota ve na nyonso ya yawu, kasi beno bika

kaka mu ke sukisa yawu samu na beno. Biblia ke tuba ti yandi “vwandaka na dyabulu.” Na yawu, yina sukisaka yawu. Mbote mingi. Ntangu yayi, yandi vwandaka mwana ya Satana. Mpe yandi banzaka ti, kusala autel mpe kusala yawu kieleka kitoko samu na kukembila, ti ya kele yina Nzambi ke zitisa.

¹⁵⁰ Ba ke banza, banza kima mutindu mosi bubu yayi. Kieleka. Yayi, “Beto ke tunga yinzo ya nene ya nene mingi. Beto ke kuzwa ba-dénomination. Beto ke sala yinzo ya nene ya kulutila nene mpe bantu ya kulutila kulwata, mbote, banganga-Nzambi yina longokaka mingi.” Bantangu yankaka Nzambi kele kumi fuku ntama katuka yawu. Ya kele kieleka. Dyaka, ya kele dibuundu.

¹⁵¹ Na yawu, kana Nzambi ke zitisaka kaka kukembila, kusungama, munkayulu, Cain vwandaka muntu ya mbote mutindu kaka Abel. Kasi ya vwandaka na nzila ya luzayikisu, ti yandi bakulaka ti ya vwandaka ve ba-pommes yina bibuti ya yandi kudyaka.

¹⁵² Mu ke tuba kima awa yina ke wakana mbote ve samu na longi, kasi mu ke tuba yawu, na mutindu nyonso. Mu ke kuwa bayankaka yayi kutuba bima, na yina munu . . . ke tuba mwa bima ya kusekisa, mu zola kutuba mutindu yina ve. Mu tubaka yayi, ti, “Kana kudyaka ba-pomme ke sala bakento kubakula ti bawu kele kimpene, beto ke sala mbote na kulutisa dyaka ba-pomme.” Beno me mona? Beno me mona? Uh-huh. Beno lemvo kila munu samu na yina, kasi ya kele kaka samu ya soba. Mu vwandaka me kanga beno awa, mpe vwanda zonga na yina me tala bakento, mpe nyonso yankaka yina. Mu—mu—mu zola kusobisa beno mabanza minuti, samu na yina ke na kwiza na ntwala. Ntangu yayi, beno tala, beno . . . Ya vwandaka ve ba-pomme. Beto zaba yawu.

¹⁵³ Dibuundu me kuma na bilumbu yayi, na bakusala ya yandi, mutindu bakusala nyonso yankaka yina muntu salaka, ke na kukuma ya luzabu ya yinza. Ba ke na kumeka na kusala dibuundu ya luzabu ya yinza, na nzila ya kubenda ya bafoto mpe ba-paroisse ya nene. Mpe ya kele yimbi mingi ti bantu ya Pantekote me kota na dibulu kaka mosi yina. Beno ke vwanda mbote na ngoma, kuna na nsongi ya nzila, mpe Mpeve ya Nzambi ya kuzunga beno. Kasi beno ke na kumeka na kufwanakana na bayankaka ya bawu, samu ti beno me kuma dénomination. Ya kele yina salaka yawu. Beno me mona? Mabuundu ke na kumeka na kuvwanda ya luzabu ya yinza.

¹⁵⁴ Mpe beno bambuka moyo, ntangu yina muntu ke kwenda na ntwala na bakusala ya luzabu ya yinza, yandi ke kufwa yandi mosi konso kilumbu. Ntangu yandi salaka tiya ya munduki, beno tala yinki ya salaka. Ntangu yandi salaka ditoma, ya ke na kufwa mingi kulutila na tiya ya munduki ke salaka. Ntangu yayi yandi me kuzwa bombe ya hydrogène. Mu ke kumiyufula yinki yandi ke sala na yina? Kieleka.

¹⁵⁵ Mpe na yawu ya kele dibuundu, na yina ya ke na kumeka na kusala na nzila ya luzabu ya yinza, na nzila ya kimatinu ya yina muntu me sala, ya ke na kunataka beno ntama mingi na Nzambi, mpe na kati ya lufwa, kulutila na yina ya vwandaka na kisika ya ntete. Ya kele kieleka. Beno sola dibuundu ya beno ve mutindu beno solaka kento ya beno. Beno me mona? Yina luzabu ya yinza me sala samu na kento vwandaka kima ya kuyituka, kasi beno ke sala mbote na kuvwanda ntama samu na yina samu na dibuundu ya beno; yandi me sala ba-fard, bamfututu, mpe bima nyonso yankaka yayi. Beno sola na nzila ya kikalulu ya Ndinga ya Yandi.

¹⁵⁶ Ntangu yayi beto fwanikisa kento ya makwela ya bubu yayi na dibuundu ba ke bokilaka kento ya makwela ya bubu yayi. Beno fwanikisa kento, yina ke na kubelama na kukwela bubu yayi.

¹⁵⁷ Ntangu yayi, beno tala kaka yina luzabu ya yinza me sala samu na yandi. Yandi ke basika, ntete, na nsuki ya kuzenga, na mosi ya mitindu ya kuzenga nsuki yayi ya Jacqueline Kennedy, beno me mona, to kima mutindu yina. Mpe beno zaba yina Bibila ke tuba? Biblia na tsyelika me pesa bakala, kana yandi zola, muswa ya kubika yandi na kufwa makwela, kana yandi kusala yina. “Yandi kele kento yina ba ke zitisa ve, kana yandi zenga nsuki ya yandi.” Biblia me tuba mutindu yina. Kieleka. Beno zaba yawu ve? Huh? Oh, yinga! Mu ke longaka mingi na Californie samu beno zaba yawu ve. Ya kele kieleka. Oh, yinga! Wapi mbote ya ke sala na munu? Ba ke salaka yawu, na mutindu nyonso. Beno lenda ve kubaka ngulu mpe kusoba nkumbu ya yandi, kukumisa yandi yembe. Beno tala.

¹⁵⁸ Beno ke zola munu ve na manima ya yayi, kasi beno ke zaba Kieleka. Beno me mona?

¹⁵⁹ Beno tala. Beto fwanikisa yawu. Beno tala yandi kumata ya kifuluka na ba-fard, kima yina yandi kele ve, kento ya makwela ya bilumbu yayi. Kana yandi sukula kizizi ya yandi, bakala ke kima na ntwala ya yandi, mu banza. Ke pesa beno boma na lufwa, katula kima nyonso yina na kento. Mpe ya kele mutindu mosi dibuundu na ntwala, ya nene ya kupakula, théologie ya nene ya Max Factor. Uh-huh. Bawu nyonso zole kele kitoko, na kizizi ya luvunu na bawu, kitoko yina muntu me sala mpe kitoko yina Nzambi me sala ve. Kikalulu mingi ve na mosi to yankaka.

¹⁶⁰ Beno tala, kaka mutindu Satana, mingi samu na kuvuna, beno fwanikisa ntangu yayi kento ya makwela ya bilumbu yayi na kento yayi: yandi ke lwata bakupe, ke pakula, ke zenga nsuki ya yandi, ke lwata bilele yina kele mutindu ya babakala, mpe ke kuwa pasteur yina ke tuba na yandi ti ya kele nyonso ya kulunga. Yandi kele muntu ya luvunu. Yandi ke tala mpasi samu na yawu na bizunga ya yisi. Ya kele kieleka. Ke sala yina samu na kuvuna, na kuvwanda kima yina yandi kele ve.

161 Ya kele mutindu dibuundu ke salaka, ke kuzwa ba-Doctorat ya Théologie, Doctorat ya Philosophie, Doctorat ya Droit. Na yawu beno ke tuba, “Pasteur ya beto kele *yayi, yina, mpe yankaka yina,*” mu banza zaba ve ya kulutula na yina me tala Nzambi kuluta Hottentot zabila mpimpa na Égypte. Ya ke kieleka. Ya kieleka. Me kuzwa kimbangi mosi ya seminare ya théologie kuna, mpe zaba ve ya kulutula na yina me tala Nzambi kuluta kima ve.

162 Dibuundu ya bilumbu yayi mpe kupakula ya bawu ya théologie, hmm, me kuzwa bakento ya bawu nyonso ya kuzenga nkembo ya bawu, na nzila ya ricky mosi ya bawu mpe pasteur yina kele na bawu, mutindu Jézabel kana ya vwandaka ntete na mosi. Nsuki ya kuzenga, bakupe, ba-fard, nyonso ya kulunga landila ntomo ya théologie, ya kele mutindu dibuundu ke telama. Kieleka. Kasi kikalulu ya yandi ya kimpeve kele ntama mingi na yina kele kento ya yinzo yina Yesu Klisto ke kwiza kuzwa.

163 Kana Muklisto nyonso ke kwela kento mutindu yina, ya ke lakisa ti yandi me kubwa na lemvo. Ntomo ya yandi ya Nzambi mpe ntomo ya yandi ya yinzo, yina yinzo fwana vwanda, kele ntama, ntangu yandi ke sola kento mutindu yina. Ve, tata. Kieleka yandi ke lunga ve ntomo ya Muklisto. Kikalulu ya yandi ya kimpeve kele na kitezo ya yisi mingi, ya kufwa, na kitoko ya dénomination mpe kulula ya yinza.

164 Kieleka ya kele kisika dibuundu kele ya kutelama bubu yayi, me tekisa kikalulu Ndinga yina kupesamaka na yandi na Satana, samu na nsambulu ya luzabu ya yinza yina muntu me sala. Ntangu, yandi vwandaka na muswa, mutindu dibuundu ya Nzambi, samu na kuvwanda na Ndinga ya Nzambi mpe kuzwa Mpeve-Santu kusala na kati-kati, kuvukisa Nzutu kintwadi na Ndinga mpe zola ya Nzambi. Na kisika ya yawu, yandi me tekisa bukuluntu ya yandi, mutindu Ésaü, mpe me baka dénomination, yina me bika yandi kusala yawu, nyonso yina yandi zolaka, kieleka, kaka samu na kuzabakana mutindu mama ya yandi kusalaka na Nicée, na Rome. Ndinga ya Nzambi!

165 Oh, mutindu yawu me kota na kitezo ya beto ya Pantekote! Ya kele yimbi mingi, kasi ya salaka yawu.

166 Beno tala, minuti kaka, masoeur na dibuundu ya Katolika. Kento yina, samu na kukuma masoeur, mpe kubaka mvwela ya nsuka yina, kieleka yandi kele ya kuteka na dibuundu yina. Yandi kele (moyo, nzutu, mpe mpeve) kima ya dibuundu yina. Yandi kele na dibanza ya yandi mosi ve. Yandi lenda ve kuzwa, ntangu yandi ke baka mvwela yina ya nsuka, ata dibanza ya yandi mosi, ata luzolo ya yandi mosi. Beno ke mona awa, ti Satana ke sala bawu kima ya yandi ya luvunu, mutindu kieleka.

167 Dibuundu ya kieleka ya Klisto, Kento ya makwela, kele mingi ya kutekama na Yandi mpe na Ndinga ya Yandi ya kusila,

tii dibanza ya kieleka yina kele na kati ya Klisto kele na kati ya beno. Wapi luswaswanu!

¹⁶⁸ Mpe beto ke mona bubu yayi, ti, dibuundu ya bilumbu yayi, dibuundu ya yinza ya bilumbu yayi, dibuundu ya yinza ya bilumbu yayi mpe dyaka ti Dibuundu ya kimpeve bawu zole kele na kivumu, ke buta bana ya babakalala.

¹⁶⁹ Mosi ya bawu, mbutukulu ya dénomination, ke pesama, mosi ya . . . kilumbu, na . . . bilumbu yayi, na Conseil ya Yinza ya Mabuundu, yina ke basisa na yinza mbeni ya Klisto, na nzila ya dénomination. Ya kele kaka Kieleka. Mu lendaka zinga to ve samuna kumona yawu. Mu banza ti mu ke lenda. Kasi, beno bantwenya, beno bambuka moyo ti beno kuwaka longi mosi kutuba yawu. Na nsuka ya ke salama. Mpe yina kele kidimbu ya kibulu, ntangu yandi ke sala Conseil yayi ya Yinza ya Mabuundu. Mpe yandi ke buta mwana ya yandi ya bakala, mbeni ya Klisto.

¹⁷⁰ Yankaka yina kele na kivumu na nzila ya Ndinga ya Nzambi mpe ke buta Nzutu, Nzutu ya kumanisa ya Yesu Klisto, yina kele Kento ya makwela. Nzutu ya Klisto me manisa ntete ve. Bantu yikwa zaba yawu? Bakala mpe kento kele muntu mosi. Mpe Klisto kele Nzutu mosi, Ndinga. Kento ya makwela fwana vwanda Nzutu yango yina bikanaka. Mpe bawu zole, kintwadi, ke sala Nzutu mosi dyaka. Mutindu Adam vwandaka na mbandukulu: bakala, kento ya yandi, kele muntu mosi. Ntangu yayi, Yandi, Kento ya kieleka ya makwela, ya kutekama mingi na Yandi, ti Yandi ke baka ve dibanza ya Yandi mosi. Dibanza ya Yandi, kielekaka, kele luzolo ya Yandi, mpe luzolo ya Yandi kele Ndinga ya Yandi.

¹⁷¹ Ntangu yayi beno tala kento ba ke bokilaka ya kukwela yina bakala me sola, mpe beno fwanikisa ya kimpeve na ya yinza ya bubu yayi, Jézabel ya kilumbu yayi yina ba me loka na Achab, baboté ya Max Factor, nyonso. Beno tala dibuundu, mutindu mosi, kasi ndumba na Ndinga ya Nzambi ya moyo; ba-dénomination ya nene, bayinzo ya nene, mbongo ya nene, difuti ya nene, nyonso ya kutekama. Bantu ya kutelama na estrade ke na kundima ti ya kele nyonso ya kulunga, mpe ke bika bawu kukota na yawu. Luvunu kaka, kaka yina. Nsungu ya Dibuundu ya Laodika kieleka ya kufwa meso, kaka kieleka yina Biblia tubaka ke salama. “Ke tuba, ‘Mu kele na bimvwama. Mu kele ya kuvwanda mutindu ntinu ya kento. Mu ke na nsatu ya kima ve.’ Kasi nge zaba ve ti nge kele mputu, yina kele muntu ya mawa, ya kufwa meso, muntu ya mawa, kimpene: kasi zaba yawu ve.” Kana ya kele ve MUTINDU ME TUBA MFUMU, Apocalypse 3, ti mu me tangaka ntete Yawu ve. Ya kele yina yandi kele, kasi zaba yawu ve! Beno banza na yawu.

¹⁷² Kana beno tuba na bakala to na kento, na bala-bala, yina kele yandi nyonso kimpene, mpe tuba na bawu ti bawu kele kinkonga, mpe ti bawu tuba, “Kipe dyambu ya nge,” oh, ya kele

kukondwa kubakula dyambu kuna kisika mosi. Ya kele na kima me tambula mbote ve na dibanza ya bawu.

¹⁷³ Mpe ntangu beno lenda tanga Ndinga ya Nzambi, mutindu bantu yina ke salaka, mpe mbotika ya Mpeve-Santu yina kele na beto bubu yayi, mpe, bantu, oh, ba ke tala beno mutindu kana beno vwandaka bantu ya kulawuka. Beno ke tuba na bawu: “Beni fwana . . .” Ba fwana butama mbala zole. Ba fwana kwikila Biblia.

¹⁷⁴ Ba ke tuba, “Ya kele disolo ya ba-Juif, ya bamvula me luta. Dibuundu ya beto kele na nzila.” Muntu ya mawa, yina kele muntu ya mawa, ya kufwa meso, kinkonga, kasi zaba kwandi ve yawu. Wapi . . . Mpe Biblia ke tuba ti ya kele mutindu ba kele.

Wapi mutindu profete ya kieleka lenda kondwa kwandi kumona yawu? Mu zaba ve.

¹⁷⁵ Ke na kukotaka kaka na kati ya mabundu ya beto nyonso, bisika nyonso. Beno tala kaka yawu, kaka na mutindu ya bilumbu yayi. “Ndumba ya ntama mpe bana ya yandi, ya bakento,” na Apocalypse 17, ke na kupesa na bantu “ya mputu, ya kufwa meso, bantu ya mawa” malongi ya yandi ya théologie ya kuswaswana na Ndinga ya Nzambi. “Mpe ba me tala na kati ya yandi myoyo ya bampika, mpe babakala mpe bakento ya—ya bisika nyonso.” Na kisika ya kubenda bantu . . .

¹⁷⁶ Klisto ke siamisa Ndinga ya Yandi, yina ke bendaka bantu. Yandi ke bendaka ve bantu na mabuundu yina kele ya kubenda na ba-dénomination ya nene mpe bakusala ya nene, mpe bimfunda ya nene mpe bima ya ntalu. Kasi Ndinga ya Nzambi ke bendaka Kento ya makwela ya Klisto.

¹⁷⁷ Ntangu yayi beno tala. Ya kele mbote na—na kutala mutindu yina—yina dibuundu ke na kubenda dibanza ya bantu na nzila ya bamvwela ya mbote mpe bilele ya ba-chorale, mpe na bakento ya bansuki ya kuzengana mpe ya kupakula bizizi. Mpe ba ke banza . . . Mpe ba ke yimba mutindu Bawanzio. Ke vuna mutindu dyabulu, ke kima bisika nyonso mpimpa nyonso na mutindu mosi ya kubina, ke banza kima ve samu na yawu. Mpe ya kele yina ba ke banza, “Ya kele nyonso ya kulunga. Ya kele kitoko.” Kasi, beno me mona, ya kele luvunu yina ba me yidika. Ya kele Ndinga ya Nzambi ve.

¹⁷⁸ Na yina, Kento ya makwela ya kieleka ke na kubenda dibanza ya Nzambi, na kubumbaka Ndinga ya Yandi. Ntangu yayi tala. Ntangu yayi ti beto tala Klisto.

¹⁷⁹ Beno ke tuba, “Mbote, ntangu yayi, beno vingila minuti, wapi mutindu samu na kitoko yayi beno ke na kuzonzilaka?”

¹⁸⁰ Biblia ke tuba, na Ésaïe 53:2, ti, ntangu Yesu kwizaka, “Ya vwandaka ve na kitoko na Yandi, ti beto zolaka zola Yandi.” Ya kele kieleka? Ya kele na ata kitoko ve. Kana Yandi zolaka kwiza na kitoko ya yinza, mutindu Satana kele bubu yayi,

bantu zolaka kima bisika nyonso na Yandi mpe kundima Yandi mutindu bawu ke salaka dibuundu bubu yayi. Ba zolaka kwikila Yandi, kuyamba Yandi, mutindu bawu ke salaka Satana bubu yayi. Kieleka, ba zolaka. Kasi Yandi kwizaka ve na mutindu yina ya kitoko, kasi Yandi ntangu nyonso ke kwizaka na kitoko ya kikalulu. Kuna, Klisto vwandaka ve Muntu ya kitoko, ya nene, ya ngolo, ya ngolo ya kulutila. Nzambi solaka ve mutindu yina.

¹⁸¹ Mu ke bambuka moyo kilumbu mosi profete mosi kumataka samu na—samu na kusola ntinu, samu na kusola ntinu na kati ya bana ya Isai, samu na kubaka kisika ya ntinu yankaka, Saül. Mpe na yawu Isai basisaka yandi, mwana ya yandi ya bakala ya nene, ya nene mingi, ya mbote. Yandi tubaka, “Yimpu ya ntinu zolaka vwanda ya kulunga, na zulu ya yintu ya yandi.”

¹⁸² Profete kwendaka samu na kutsyamuna yandi mafuta. Yandi tubaka, “Nzambi mangaka yandi.” Mpe Yandi mangaka mosi na mosi ya bawu, tii yandi kwizaka na mwa, muntu mosi ya ndundu, ya mapeka ya kubwa. Mpe yandi tsyamunaka mafuta na zulu ya yandi, mpe yandi tubaka, “Nzambi me sola yandi.” Beno me mona? Beto ke solaka na nzila ya kumona. Nzambi ke solaka na nzila ya kikalulu.

¹⁸³ Kikalulu, ya me vwandaka ntete ve na kikalulu mutindu ya Yesu Klisto. Ya ke zinga na kati ya beno mpe ke lakisa Yandi. Beto ke mona ti ya kele kieleka. Ya kele ve kitoko ya Yandi ya yinza yina ke bendaka Kento ya Yandi ya makwela. Ya kele kikalulu ya Yandi, kikalulu ya Dibuundu, yina Yesu ke talaka; ve kisika ya kele bayinzo ya nene, kisika ya kele dénomination ya nene, kisika ya kele na bantu ya nene. Yandi silaka na kukutana na kisika nyonso zole to tatu kele ya kuvukana kintwadi. Kieleka. Ya kele kisika mukwikidi ya kieleka ke pemaka na bivuvu ya yandi, ya kele na zulu ya Ndinga yango ya Nzambi yina ke ya kusiamisa na Kieleka, yina ya kele. Ke sola na nzila ya Ndinga ya Yandi, ve nkonga ya luzolo ya yinza. Ba ke zola yawu ve.

¹⁸⁴ Ata ntembe ti yandi kufwa makwela na Yandi, samu ti yandi kondwaka luzayikisu ya Yandi, mpe yandi kele na yawu ve. Yandi ke keba ve na yandi, mutindu yandi ke sala bisalu mpe ke sala, mpe lutangu ya bima yayi ya yinza yina kele na yandi.

¹⁸⁵ Yandi ke na kusosaka kikalulu ya yandi, kikalulu ya Klisto. Ntangu yayi, mwa ntangu fyoti kaka ntangu yayi. Kaka yina. Yandi solaka Kento ya makwela samu na kulakisa kikalulu ya Yandi, na yina mabuundu ya bilumbu yayi ya bubu yayi kieleka ke kondwaka dikani ya Yandi—ya Yandi awa, fuku ya ba-mille, samu ti bawu mangaka *Yayi* na kuvwanda Kieleka. Na yawu wapi mutindu ya lendaka vwanda? Ntangu yayi, Yandi ke na kusosaka kilumbu ntangu Kento ya makwela yina ke vangama, Hébreux 13:8, kieleka kaka mutindu Yawu vwandaka, mutindu Yandi vwandaka. Ya fwana vwanda mutindu mosi ya nsuni ya

Yandi, mikwa mosi, Mpeve mosi, bima nyonso mosi, kaka kieleka ya kutunga, mpe bawu nyonso zole kuna ke kuma muntu mosi. Tii dibuundu ke kuma yawu, ba kele mosi ve. Kikalulu ya Yandi, Ndinga, samu na nsungi yayi, fwana ba sala. Ba fwana sala Yandi mutindu Yandi kele.

¹⁸⁶ Ntangu yayi, samu na kumanisa, mu zola kutuba samu na yinki mu me tuba bima yayi, mpe mu ke—mu ke manisa. Mpimpa yankaka yina, ya lendaka vwanda na ngunga ya tatu na suka, mu vwandaka ya kuvumbuka.

¹⁸⁷ Mu ke baka mosi ya beno samu na kupesa mvutu na yayi. Mu me tubaka ntete na beno kima na Nkumbu ya Mfumu kasi yina vwandaka kieleka? Ntangu nyonso ya ke vwandaka kieleka. Na ntima mpe moyo ya munu nyonso, Nzambi zaba ti ya kele kieleka. Ya kele na ata mosi ve, ata kisika na yinza, na mafunda ya bima yina kutubamaka, ti Yandi kondwaka ata mpova mosi ve ya yawu. Ntangu nyonso ke salamaka na mutindu ya kulunga.

¹⁸⁸ Mpe ntangu mu vwandaka na Phoenix, kilumbu yankaka yina, to na kutala mvula me luta ya vwandaka, mpe tubaka na beno na yina me tala Nsangu yango na—na *Batata, Wapi Ntangu Yawu Me Kuma?* Mpe tubaka na beno, “Kukutana ke salama kuna na Bawanzio Sambwadi,” mpe ke vwanda kuzibuka ya Bidimbu, mpe yina. Mpe kuna *Life* magazine nsamunaka mukanda ya yawu, Nlemo yayi ya nene yina vwanda kwenda na zulu na mupepe, bakilometele makumi yiya na nana na zulu, bakilometele makumi yiya na tatu ya nene. Ba tubaka ti ba vwanda lenda ve na kubakula yina ya vwandaka; ba zaba ntete ve. Mpe bantu ya kuvwanda kaka awa na kati ya dibuundu yayi na nkokila yayi, vwandaka ya kutelama kaka kuna na munu ntangu ya salamaka, kieleka kaka yina Yawu kutubaka. Yandi tubaka na munu bima yina zolaka salama, mpe salamaka kaka ya kieleka. Mutindu mosi na mosi ya Bidimbu yango kufungamaka, mpe tubaka mansweki yina vwandaka ya kubumbama nzila nyonso ya bansungi yina ya ba-reformateur mpe nyonso yina, kulunga kaka.

¹⁸⁹ Mutindu, ya kutelama na zulu ya mongo, bantu, tatu to yiya ya bawu kele ya kutelama kaka awa kele awa ntangu yayi, inga, ya kulutila yina. Na kumataka mongo, Mpeve-Santu tubaka, “Lokota ditadi yina.” Beto vwanda zomba. Yandi tubaka, “Losa yawu na mupepe, mpe tuba, ‘MUTINDU ME TUBA MFUMU.’” Mu salaka yawu. Na yisi kuna me kwiza mwa mupepe na mutindu ya kikekololo. Mu tubaka, “Na kati-kati ya bangunga makumi zole na yiya, beno ke mona diboko ya Nzambi.” Bantu yayi ya kuvwanda awa na ntangu yayi.

¹⁹⁰ Kilumbu yina landaka, pene ya ngunga ya kumi, ya kutelama kuna, mu tubaka, “Beni yilama. Beni kwenda na yisi ya ditoma kuna,” na mosi ya minwani ya ntama. Mu tubaka, “Kima ke na kuyilamaka samu na kusalama.” Zulu vwandaka pwelele,

ya vwandaka na canyon ya nene. Kuna kwizaka na yisi Tiya yina vwandaka dyengila katuka na Zulu, salaka kaka makele na ngolo nyonso mutindu Yawu lendaka, bulaka bibaka mutindu yina. Mu—mu vwandaka kaka ya kutelama na yisi ya Yawu. Mu me katula yimpu ya munu, me telemisa yintu ya munu. Ya kwizaka na zulu ya munu pene ya bacentimele makumi yivwa to bacentimele nkama na makumi zole, mpe me fungula lweka yina na ziunga ya kibaka yango mutindu yina, mpe me pasuka. Mpe me vutuka na mupepe, mpe me dyengila dyaka na nziunga, mpe me kwiza na yisi, bambala tatu, mpe zengaka bansongi ya divunda ya prosopis, na bitamina ya bametele nkama na makumi nana na tatu. Beno ke kuwa bantu yango kutuba, “Amen”? Ba vwandaka kuna ntangu ya salamaka, beno me mona, mpe salaka bakubula tatu ya mipepe ya ngolo ya tiya.

¹⁹¹ Ntangu ba basikaka na yisi ya matoma mpe bima nyonso, me vutuka na munu, bawu tubaka, “Ya zolaka kuzwa nge, kuna ata ditona ya mafuta zolaka bikana ya nge.”

¹⁹² Mu tubaka, “Yawu vwandaka—Yawu vwandaka Yandi. Yandi vwandaka zonza na munu.” Nzambi kuzonza na nzila ya kitembo. Beno me mona? Mpe kuna vwandaka ya kutelama, Dikunzi ya Tiya mosi yina beno ke mona na foto.

Mpe ntangu Yawu kwendaka na zulu, ba tubaka, “Yinki ya kele?”

Mu tubaka, “Lusambusu ke na kubula na Côte Ouest.”

¹⁹³ Bilumbu zole na manima ya yina, Alaska zolaka dyama. Beno me mona? Ya me bula mbala mosi, kuna, kubula ya ntete.

¹⁹⁴ Kisika, beno fwana sala kima, samu na kumonikisa yawu. Mutindu muntu yina me tula ndambu ya mungwa na nzungu, mpe me losa yawu na kati ya maza, mpe me tuba, “MUTINDU ME TUBA MFUMU, ti maza ya vwanda swi.” Mpe mosi yankaka, Yesu, me baka maza mpe me tula yawu na kati ya mbungu, mpe—mpe me sala vinu na yawu.

¹⁹⁵ Beno fwana kuzwa kima, samu na kumonikisa yawu. Ya kele yina ya vwandaka, yina kwendaka na zulu na mupepe mpe kulumukaka. Ya kele yina salaka ti mwa kitembo yina kubanda. Na kati-kati ya bangunga makumi zole na yiya, Yawu kubulaka mongo yina tii ya fungulaka lweka yina na ziunga ya yawu.

¹⁹⁶ Révérend Tata Blair ya kuvwanda awa, mu ke na kutalaka yandi ntangu yayi, yandi vwandaka na zulu kuna mpe lokotaka ndambu ya bitini ya yawu, mpe nyonso yina. Awa kele Terry Sothmann, na bayankaka ya bawu, ya kutelama awa, mpe Billy Paul. Mpe bampangi ya babakala, mingi ya bayankaka ya bawu kele ya kuvwanda na kati awa, bayina vwandaka kaka kuna na kumona yawu kusalama ntangu Yawu kuzengaka yawu.

¹⁹⁷ Ya kele dyambu ve ya kuyidika. Ya kele kieleka. Ya vwandaka ve kuna na bilumbu ya Biblia. Ya kele ntangu yayi. Beno me

mona? Nzambi mosi yina yina ntangu nyonso ke lakisaka munu bima yayi, mpe ya me salamaka, kieleka mpova na mpova. Ata mbala mosi ve ti yawu me kondwaka kilumbu mosi. Na ntangu yayi mu ke na kupesa Yandi lukumu.

¹⁹⁸ Basabala fyoti me luta, mu vwandaka na kati ya vision. Mpe mu vwandaka ya kutelama na zulu ya kisika mosi ya zulu, mpe mu vwandaka mona Dibuundu na ntwala. Mpe mu talaka, na kukatukaka. . . Mu vwandaka ya kutelama na kutala mingi mutindu *yayi*, vwanda tala na ntwala ya Wesete. Mpe vwandaka kwiza mutindu *yayi* nkonga ya bakento ya luzolo, ya kulwata kieleka ya kitoko, nsuki ya yinda ya kuyilama mbote na manima, basimisi na maboko, mpe ba-jupe na yisi na mutindu ya kulunga. Mpe bawu nyonso vwandaka tambula na kuyimbila, mutindu, “Na ntwala, basoda ya Baklisto, beto tambula mutindu na mvita, na kulunsi ya Yesu na ntwala.” Mpe na yina ba vwanda luta, mu vwandaka ya kutelama, mpe ya vwandaka na Kima kuna, Mpeve mosi, ya vwandaka Nzambi, mpe tubaka, “Ya kele Kento ya makwela.” Mpe mu talaka, mpe ntima ya munu vwandaka na kyese. Mpe Kento kwendaka ziunga mutindu *yayi*, mpe lutaka pene-pene na manima ya munu.

¹⁹⁹ Na manima ya mwa ntangu, ntangu kento vutukaka mutindu *yayi*, Yawu kutubaka, “Ntangu yayi dibuundu ya bilumbu yayi ke kota na ntwala.” Mpe awa me kwiza dibuundu ya Asie. Mu me monaka ntete ve nkonga ya boma ya mutindu yina.

²⁰⁰ Awa me kwiza mabuundu yankaka, ya bayinsi yankaka. Ba vwanda talana ya boma.

²⁰¹ Mpe mu—mu ke na kutuba yayi samu ti ya kele kisalu ya munu na kutuba kieleka, na ntwala ya Nzambi. Mpe ntangu Yandi tubaka, “Awa ke na kwiza dibuundu ya Amerika ntangu yayi, yina ke vwanda na ntwala,” kana mu me monaka ntete nkonga ya bampeve ya yimbi, ya vwandaka yina. Bakento yango vwandaka ya muvimba kimpene, na mwa kima mosi ya ntama yina vwandaka talana gris, mutindu kulere ya nzutu ya nzawu. Mpe ba vwanda simba yawu na ntwala ya bawu, na zulu ya vwandaka na ata kima ve. Mpe ba vwanda sala mutindu yayi ya kima, yina, mabina yayi—yayi yina bana yayi ke salaka na ngaanda awa, twist mpe kima yina, mpe mutindu ya muziki yina. Mpe ntangu mu monaka Miss U.S.A. kumata, mu zolaka kupema diaka ve.

²⁰² Ntangu yayi, yayi kele MUTINDU ME TUBA MFUMU. Kana Beno ke kwikila munu na kuvwanda kisadi ya Yandi, beno kwikila munu ntangu yayi. Mu zolaka tuba yina samu na kima ve na yinza. Ya kele na mbongo mingi ve na yinza nyonso samu na kuzwa munu kutuba yina kana ya vwandaka ve kieleka.

²⁰³ Mpe ntangu yandi kulutaka, ya vwandaka talana kima ya kulutika boma yina mu me monaka ntete ve. Mu banzaka, “Nzambi, na ngolo nyonso mutindu balongi mpe beto bankundi

vwandaka me sala samu na kuzwa samu na Nge Kento ya makwela, mpe yayi kele ya kulutila yina beto me lenda na kusala.” Yandi vwandaka ningisa nzutu nyonso, na kusimbaka *yayi* na ntwala ya yandi, mutindu mosi ya ba-jupe yayi ya kento ya hawaienne vwanda bina, vwandaka simba yawu na ntwala ya ndambu ya yandi, ndambu ya yandi ya yisi, mutindu *yayi*, avwanda bina mpe vwanda ningisa nzutu nyonso mutindu bana yayi ke salaka na nganda awa na . . . na bakimpa ya mpamba-mpamba yayi yina ba ke kuzwaka, na kuningisaka nzutu nyonso. Yina vwandaka Miss ya Buklisto ya Amerika.

²⁰⁴ Mu ke siamisa beno yawu, na nzila ya lusalusu ya Nzambi, ti ya kele mutindu ya ke talanaka na ntwala ya Yandi. Mu—mu kaka . . . Mu bandaka . . . Mu zolaka kufwa. Mu banzaka, “Na manima ya kumeka nyonso, mpe kulonga nyonso, mpe kundimisa nyonso?” Mosi na mosi ya bawu na nsuki ya kuzenga, mpe bawu vwandaka ningisa nzutu nyonso mpe vwandaka landila, na kusimbaka *yayi* na ntwala. Ba me belama, kisika mu vwandaka ya kutelama kuna na Muntu ya kimpeve yayi. Mu vwanda lenda ve na kumona Yandi. Mu vwanda kuwa Yandi kuzonza na munu; vwandaka kaka pene-pene ya munu. Kasi ntangu bawu balukaka mutindu *yayi*, ba vwanda simba *yayi*. Mpe vwanda ningisa kaka nzutu nyonso mpe vwanda seka mpe vwandaka landila, vwandaka landila mutindu yina, vwanda simba *yayi* na ntwala ya bawu.

²⁰⁵ Ntangu yayi, munu ya kutelama na Mvwandulu ya Yandi kuna, mpe kisadi ya Yandi. “Mpe na nyonso mu me meka, yina kele ya kulutila yina mu lendaka na kusala?” Mu banzaka, “Nzambi, wapi mbote ya ke sala na munu? Wapi mbote ya ke sala? Bakudila nyonso, mpe balemvo nyonso, mpe bakundimisa nyonso, mpe bidimbu ya nene mpe bima ya ngitukulu mpe bimangu yina Nge lakisaka. Mpe mutindu mu vwanda telamaka kuna, mpe kukwenda na yinzo mpe kudila na manima ya kulonga na bawu mpe nyonso, mpe wapi mbote ya me sala na munu? Mpe na manima mu fwana kulakisa kima ya mutindu yina na Nge, mutindu Kento ya makwela?”

²⁰⁶ Mpe na yina mu vwandaka ya kutelama kuna, na kutalaka, yandi vwandaka luta. Mpe beno lenda tala ndambu ya manima ya yandi, na kima ve na zulu, na kusimbaka *yayi* na ntwala ya yandi na yina yandi vwandaka ningisa nzutu nyonso, mutindu yina, landila twist yayi, na kulosaka binama ya nzutu ya yandi mutindu yina. Mpe, yandi, oh, ya vwandaka mpamba-mpamba, mutindu yandi vwandaka landila na kusala, nzutu ya yandi vwandaka ningana nyonso mutindu yina. Ntangu yayi mu . . .

²⁰⁷ Beno ke tuba, “Yinki ya zola kutuba, Mpangi Branham?” Mu zaba ve. Mu ke na kutuba kaka na beno yina mu monaka.

²⁰⁸ Mpe na yina yandi vwandaka luta mutindu yina, mu me tala yandi. Oh, kieleka mu zolaka kufwa. Mu me baluka kaka. Mu

banzaka, “Nzambi, mu me fundisama. Ya—ya kele dyaka ve na nsatu ti mu meka kima ntangu yayi. Mu ke sala kaka mbote na kubika kusalu.”

²⁰⁹ Mama Carl Williams, kana nge kele ya kuvwanda awa, mpe ndosi yina nge tubilaka munu, ntama mingi ve, yina nge kuzwaka na mpimpa yina, yina vwandaka kwamisa nge, yawu yayi. Ba me katula na maboko ya munu kinatinu ya ditoma.

²¹⁰ Kuna, mu me banza kaka, “Mu—mu ke sala kaka mbote na kuzimbana yawu.” Mu kwendaka.

²¹¹ Kuna, na mbala mosi, mu me kuwa Yawu kukwiza dyaka. Mpe vwandaka kwiza na lweka *yayi* Kento mosi ya makwela yina kendaka mutindu *yayi*. Awa me kwiza dyaka bantwenya ya bakento, mpe mosi na mosi ya bawu vwandaka ya kulwata kazaka ya yinsi ya bawu kisika bawu katukaka, mutindu Suisse, Allemagne, mpe nyonso yina, mosi na mosi vwandaka ya kulwata mutindu yina ya kazaka, bawu nyonso na nsuki ya yinda, kieleka kaka mutindu ya ntete yina. Mpe awa ba vwandaka kwiza, na kutambulaka. “Na ntwala, basoda ya Miklisto, na kutambulaka mutindu na mvita.” Mpe ntangu bawu nyonso kulutaka na ntwala ya kutelama kisika beto vwandaka ya kutelama, kaka na mbala mosi, disu nyonso kwendaka lweka yina. Mpe kuna bawu balukaka, mpe landilaka na kukwenda, na kutambulaka.

²¹² Mpe kaka na yina bawu kubandaka na kumata na kukota na mazulu, yankaka yayi me kwenda na simu ya mongo mpe me kulumuka, mutindu *yina*.

²¹³ Bayayi me banda na kutambula kaka na zulu na kati ya mazulu. Mpe na yina bawu vwanda tambula, mu talaka zole to tatu ya mwa bana ya bakento na manima, vwanda talana mutindu ti ba lendaka vwanda mosi ya mwana ya kento ya nzenza, mutindu ya Suède to ya Suisse, to ya kisika mosi. Ba bandaka na kutala bisika nyonso, mpe kuzwaka . . . Mu tubaka, “Beno sala yina ve! Beno basika ve na kitambi yina!” Mpe na yina mu bokaka mutindu yina, na vision, mu me vutukila munu mosi, ya kutelama kuna na diboko ya munu mutindu *yina*. Mu banzaka, “Mbote . . .”

²¹⁴ Ya kele samu na yina mu me tuba yina mu kuzwaka, na nkokila yayi. Mu zola kupesa beno kyuvu. Ngunga me luta mutindu beto ke na kubanza? Ya lendaka vwanda ti ba me bokila yimeni mpe me sola Kento, ya kutula kinyemo na kati? Ya ke vwandaka ve na mosi dyaka, beno zaba. Ya lendaka salama? Oh, yinga. Oh, yinga.

²¹⁵ Beno bambuka moyo na yina mu tubaka, kilumbu yina na madya ya suka. Na kuvukisa ya ba-fututu ya nkuna ya bakala mpe ya kento, ya kele na mafuku ya bankuna yina ke basika, mafuku ya meki ke basika. Kasi ya kele kaka na mosi ya bawu yina ke zinga, mpe, dyaka, bawu kele mosi na mosi kaka mutindu mosi: mosi na kati ya fuku mosi. Mosi na mosi ya bawu, diki mosi

mpe mutindu mosi ya nkuna. Mosi ya bawu ke zinga. Bayina me bikana nyonso ke kufwa.

²¹⁶ Muntu ve lenda tuba wapi yina ya diki me yela, mpe, oh, yinki samu na yina. Nzambi ke baka lukanu ti, kana ya ke vwanda mwana ya bakala to mwana ya kento, ya zola to ya mbwaki, to nyonso yina ya ke vwanda. Nzambi ke bakaka lukanu yina. Ve ya ntete yina ke kwiza, kasi ya ntete yina Nzambi ke baka lukanu. Ya lendaka vwanda na mosi yina lendaka kwiza na zulu *awa*, mpe mosi. . . Kana beno me talaka ntete yawu, na kizama na laboratoire, kumona bawu kuvukana. Mu me talaka yawu mbote. Nzambi fwana kubaka lukanu na yawu. Mosi, mosi na mosi ya bawu, kele kaka mutindu mosi, kasi na nzila ya kusola. Kubutuka ya yinza kele na nzila ya kusola. Nzambi ke bakaka mosi na kati ya fuku.

²¹⁷ Ntangu Israël bikaka Égypte, na nzila ya bawu na yinsi ya nsilulu, ba vwandaka pene-pene ya mafuku zole ya bantu. Mosi na mosi ya bawu vwandaka na yisi ya munkayulu mosi ya mwana ya dimeme, to ba zolaka zinga ve. Mosi na mosi ya bawu vwandaka kuwa Moïse, profete. Mosi na mosi ya bawu vwandaka ya kubotama na yandi, na Nzadi ya Mbwaki. Mosi na mosi ya bawu kubinaka, bakento na Miryam, nzila nyonso na lweka ya (ntangu) simu ya mubu, ntangu Nzambi kufwaka mbeni. Mosi na mosi ya bawu kutelamaka na Moïse, mpe kuwaka yandi kuyimba na Kimpeve. Bawu, mosi na mosi, kudyaka mani na ntoto ya kuyuma, yina kubwaka katuka Mazulu. Mani ya mona, konso nkokila, yina kele kifwanukusu ya Nsangu, mosi na mosi ya bawu kudyaka na yawu. Kasi, na kati ya mafuku zole, bantu yikwa kumaka? Zole. Mosi na kati ya fuku mosi.

²¹⁸ Ya kele na pene-pene ya bankama tanu ya mafuku ya Baklisto na yinza na nkokila yayi, na kutangaka Katolika mpe nyonso. Bankama tanu ya mafuku kele mikwikidi ya kufwanikisa na yinza. Kana Enlevement kusalama na nkokila yayi, ya zola tuba. . . kana mosi na kati ya fuku vwandaka lutangu. Mu ke tuba yina ve. Kasi kana ya vwanda, bankama tanu ya bantu, na bangunga yiya yina ke landa, ke kuzimbana. Beno ke kuwa yawu ata fyoti ve. Ya ke vwanda ti mingi ke zimbana, na mutindu nyonso, yina ba lenda tanga ve.

²¹⁹ Kuna ya lenda vwanda, kusalama na beto, nkundi, mutindu ya salamaka ntangu Jean Baptiste kwizaka. Mpe bilandi tubaka, “Samu na yinki Masonuku ke tuba, samu na yinki bantumwa to baprofete tubaka, samu na yinki ya kele ya kutuba ti Élie fwana kwiza ntete mpe kuvutula bima nyonso?”

²²⁰ Yandi tubaka, “Mu ke tuba na beno ti Élie kwizaka yimeni, kasi beno zabaka yawu ve.”

²²¹ Mosi ya bilumbu yayi ba lenda bika beto ya kuvwanda awa, “Yinki me tala Enlevement ntete mpasi yayi ya nene kusalama?”

“Ya me salamaka dezia mpe beno zabaka yawu ve.”

222 Nzutu nyonso, ya kutula kinyemo na kati, kukangaka kaka Yawu na kitambi. Mu ke na kutuba ve ti ya kele mutindu yina. Mu banza ti ya kele ve mutindu yina. Kasi, nkundi, ntangu ya ke. . .

223 Kana beto ke na kutala na ntima ya beto, na nkokila yayi, ti beto zola sungika baluzingu ya beto, mpe bima yina beto me sala, beno bika munu kupesa beno malongi, mutindu mpangi ya longi. Mu ke tuba yayi samu na mbala ya ntete, na zulu ya chaire. Mu me tandama mingi na nkokila yayi, na zulu ya *Yayi*, kulutila yina mu me salaka na kima nyonso yankaka, na ntangu nyonso, na mutindu nyonso, na ntuala ya bantu, samu ti mu me kuzwa mingi kimpwanza na balukutakanu yayi. Kana beno ke kwikila munu kuvwanda profete ya Nzambi, beno kuwa yina mu me tuba na beno. Kana beno ke na kuwa mwa makelele na ntima ya beno, beno kwenda na Nzambi na ntangu kaka yayi. Beno sala yawu.

224 Beno sikama kaka minuti, beno babakala. Beno tala na ba-credo ya beno—beno yina beno ke sadilaka. Beno tala na kati ya mabuundu ya beno. Kieleka ya kele kaka na Ndinga ya Nzambi? Beno me nungisa misiku nyonso? Beno ke tuba, “Mu kele muntu ya mbote.” Mutindu vwandaka Nicodème, mpe mutindu vwandaka bayankaka nyonso. Ba—ba vwandaka bantu ya mbote. Beno me mona? Ya kele na kima ve ya kusala na Yawu.

225 Mpe, beno bakento, mu zola ti beno kutala na kitala-tala, mpe beno tala yina Nzambi ke lomba kento na kusala. Mpe beno mona na kitala-tala ya Nzambi, ve na kitala-tala ya dibuundu ya beno ntangu yayi, na kitala-tala ya Nzambi; mpe beno mona kana beno lenda vwanda ya kulunga, na luzingu ya beno, Kento ya makwela ya kimpeve ya Yesu Klisto.

226 Balongi, beno banza mutindu mosi. Beno ke zengaka bansongi *awa*, samu na kuvuukisa bakutala ya muntu kuna? Beno zola kusala *yayi* kana ya vwandaka ve. . . mpe ba ke tula beno na ngaanda ya dibuundu? Kana beno ke na kutala mutindu yina, mpangi ya munu ya luzolo, bika mu kebisa nge, na Nkumbu ya Yesu Klisto, beno kima ntama ya yawu ntangu yayi.

227 Mpe, mama, kana nge lenda ve na kulunga na misiku ya Muklisto, ve mutindu Muklisto ya nkumbu, kasi na ntima ya beno, mpe ti luzingu ya beno kuvwanda kieleka kutalana mutindu certificat ya makwela ya Nzambi, awa, ya ke tuba ya fwana vwanda. . .

228 Mpe, muntu ya dibuundu, kana dibuundu ya beno kele ve mutindu yina, lenda ve kulunga na misiku ya Nzambi ya Ndinga ya Yandi, basika kuna mpe kota na kati ya Klisto.

229 Yina kele malongi samu na muntu mosi. Beto zaba ve na wapi ntangu, mpe beno zaba ve na wapi ntangu, ti mbanza yayi kilumbu mosi ke vwanda na yisi ya mubu yayi awa.

230 “Oh, Capernaüm,” tubaka Yesu, “nge yina me zanguka tii na zulu, ba ke kulula nge tii na difelo. Samu ti, kana bisalu ya nene

kusalamaka na Sodome mpe Gomorrhe, ya zolaka vwanda dyaka tii na kilumbu yayi.” Mpe Sodome, Gomorrhe keke na kati na yisi ya Mubu ya Kufwa. Mpe Capernaüm keke na yisi ya mubu.

²³¹ Nge mbanza, yina ke pesa nsangu ya kuvwanda mbanza ya Bawanzio, nge yina me zanguka nge mosi na zulu, mpe me fidisa bima nyonso ya mvindu, ya boma ya bilumbu yayi mpe nyonso, na kisika ti mpe bayinsi ya nzenza ke kwiza awa na kubaka bima ya beto ya boma mpe kufidisa yawu ntama, na mabuundu ya beno ya nene mpe ba-paroisse, mpe nyonso yina, mutindu beno ke salaka. Bambuka moyo, kilumbu mosi nge ke vwanda na yisi ya mubu, ntangu yayi kaka yisi ya nge me fuluka na mabulu mutindu bayinzo ya banyosi. Nganzi ya Nzambi keke kaka na yisi ya nge. Tii wapi ntangu dyaka Yandi ke simba kinkunku ya zelo yayi ya kulelika na zulu ya yawu? Ntangu, mubu yango kuna, kilometele mosi na sambanu na yisi, ke syelumuka na kati kuna, tii na Salton Sea. Ya ke vwanda yimbi kulutila kilumbu ya nsuka ya Pompéi. Balula ntima, Los Angeles.

²³² Beno balula ntima, bayankaka ya beno, mpe beno baluka na Nzambi. Ngunga ya nganzi ya Yandi keke na zulu ya ntoto. Beno kima na yina ya keke na ntangu ya kukima, mpe beno kwiza na Klisto.

Beto sambila.

²³³ Nzambi ya luzolo, na yina, mpeve ya munu, ke na kuningana na kati, ntima ya munu ke na kubasisa masa ya meso ya kupesa malongi. Pesa, O Nzambi, ti babakala mpe bakento kubanza ve ti yina mu me tuba kuvwanda nsaka ya kuseka, mpe ti bantu yina ke kwenda na dibuundu kubanzila yawu ve mutindu kima yina me vwanda samu na kutelemina nsatu ya muntu to kutelemina bawu. Ti bawu kumona, Mfumu, ya keke na kati ya zola.

²³⁴ Nge keke mbangi ya munu, Nzambi ya Ngolo nyonso, ti bisika nyonso na simu yayi mu me kwenda, mvula na manima ya mvula, na kusamunaka Ndinga ya Nge. Vwanda mbangi ya munu, O Nzambi, kana ya ke salama na nkokila yayi, mu me tuba Kieleka. Nge zaba vision yayi ya Kento ya makwela keke Kieleka. Mu me baka Nkumbu ya Nge na yawu, Mfumu, mpe me tuba ti ya vwandaka MUTINDU ME TUBA MFUMU. Mpe mu ke tala ti mu keke na dibanza ya kusungama, Mfumu, samu na yina mu ke na kusalaka.

²³⁵ Na yawu mu ke sambila Nge, Mfumu, na Nkumbu ya Yesu, ti bantu kuningana bawu mosi, na nkokila yayi, mpe kukima na nganzi yina ke na kwiza, samu ti I-Kabod keke ya kusunama na zulu ya myelo mpe na zulu ya bayinsi. Kidimbu ya ndombi me tulama na zulu ya yawu. Mpeve ya Nzambi me nyonga mpe me kwenda ntama na yawu, mpe ba me tula bawu na kitezolo mpe ba keke kilo ve. Feti ya Ntinu Nebucadnetsar me vutukila dyaka, na mikembo ya kifuluka na malafu yina ke kolisa mpe bakento ya kulwata ndambu, ke bokila bawu mosi Miklisto.

²³⁶ O Nzambi ya Mazulu, vwanda na kyadi na yinza ya masumu mpe bantu ya masumu, Mfumu, na yina beto kele na nkokila yayi. Nzambi, mu ke na kumeka na kutelama na kati-kati mpe kulomba kyadi ya Kinzambi, ti Nge ke zonza na kati ya nkonga yayi na nkokila yayi mpe kubokila Kento ya Nge ya makwela na kusala keba, Mfumu, na kutambula ve na kidimbu ya credo nyonso, kasi na nzila ya makelele ya Nsangu ya mbote ya Mfumu Yesu Klisto. Pesa yawu, O Nzambi. Ti ya kuzabana, na nkokila yayi, ti Nge kele Nzambi, mpe ti Ndinga ya Nge kele Kieleka. Na yina, muntu yandi mosi, na ntwala ya bantu yayi, beto ke bokila bawu na kusala keba na Ndinga ya Nge.

²³⁷ Na Nkumbu ya Yesu Klisto, mu me sambila samu na bawu, Mfumu. Ba me monaka Nge, kukondwa ntembe, kutambula na kati-kati ya bankonga ya bawu mpe kutuba na bawu yinki kele na kati ya ntima ya bawu. Mpe Nge zaba, Mfumu, yina, malu-malu yayi, ke na kusalaka. Nge zaba ti ya kele Kieleka, O Nzambi. Mpe mu ke sambila Nge, na Nkumbu ya Yesu, ti Mpeve-Santu kulombila dyaka, Mfumu, mpe kubenda na kati ya bantu yayi, Mfumu, bayina kele ya kusonama na kati ya Buku ya Luzingu ya Mwana-dimeme. Pesa yawu, O Nzambi. Mu ke sambila na ntima ya munu nyonso.

²³⁸ Bantu yayi, na bumuntu, Mfumu, ke pesa munu mbongo yina me bikana na bawu, samu na kusadisa Nsangu. Ba ke sala nyonso yina ba lenda. Kasi, O Nzambi, ntangu ya ke kumaka samu na kusungama na Yawu, mpe kukota na Yawu, mu ke sambila, Nzambi, ti yayi ke vwanda nkokila yina Nge ke futa bawu mpe ke tsyamuna Mpeve-Santu ya Nge na zulu ya lukutakanu yayi. Mpe ti ya vwanda ve ntangu ya kuseka to ya kudumuka bisika nyonso, kasi ya kudila mpe ya kuboka, mpe kubalula ntima, na kusimbaka mampoka ya autel, na yina beto ke na kumona balufundusu kungana na yisi ya beto, na nkokila yayi. Pesa yawu, Nzambi. Mu ke sambila na mutindu ya kusungama mutindu mu zaba, na Nkumbu ya Yesu Klisto.

²³⁹ Mpangi ya munu ya bakala, mpangi ya munu ya kento, mu—mu zaba ve yinki dyaka mu ke tuba, kana mu kuzwa lemvo na meso ya beno, na nzila ya ngolo ya Nzambi, kana beno ke kwikila munu kuvwanda profete ya Yandi. Yayi kele mbala ya ntete na ntwala ya bantu mu me tuba yawu. Kasi mu ke na kutala mutindu mosi ya kukebisa ya mutindu yankaka. Mu kele ve ya kukubama samu na yayi. Beno zaba ti mu kele ve. Mu ke salaka ve mutindu yayi. Mu me vwanda na maketi-ke ti na kuzonza Nsangu yango mpe kutuba bima yango. Mu me baka banzila yankaka mpe nyonso yankaka, samu na kusala yawu ve. Kasi Yawu me tubama, mpe Yawu ke telama na Kilumbu ya Lusambu, mutindu mbangi ti mu tubaka Kieleka. Ya kele **MUTINDU ME TUBA MFUMU NZAMBI! . . . ? . . .**

²⁴⁰ Oh, beno Pantekote, beno kima samu na luzingu ya beno. Beno kima na mampoka ya autel mpe beno dila na ngolo, ntete

ntangu luta, samu ti ngunga ke na kwiza ntangu beno ke dila mpe ya ke sala ata mbote ve. Samu ti Ésaü sosaka na kutala kisika, ya bukuluntu ya yandi, mpe lendaka ve na kutala yawu. Mu me kupesa beno, oh, Californie. Oh, convention ya Bantu ya Mumbungu ya Nsangu ya mbote ya Muvimba, beno bayina mu zola, bayina mu bikaka mpe na bayina mu kukangamaka, na ntima ya munu nyonso, mu me kupesa beno na Yesu Klisto, na nkokila yayi. Beno tina na Yandi! Beno bika ata fyoti ve dyabulu kulembisa beno na Yayi. Beno vwanda kaka na Yawu tii beno ke, mosi na mosi, ke fuluka na Mpeve-Santu, na mutindu yina, ya ke sala beno kukwiza na Ndinga yayi, ya ke sala beno bakento kusungama, ya ke sala beno babakala kusungama. Kana beno tuba ti beno kele na Mpeve-Santu, mpe ke sungama ve na Ndinga, ya kele mpeve yankaka na kati ya beno. Mpeve ya Nzambi kele na zulu ya Ndinga ya Yandi, ya Mesiya, Ndinga ya kupakulama. Kento ya makwela fwana vwanda Mesiya ya fioti, Ndinga ya kupakulama.


²⁴¹ Beto telama, na Nkumbu ya Mfumu Yesu Klisto. Kana beno kuwa dyaka ve ndinga ya munu. . . Kasi, kana Nzambi zola, mu ke vwanda na Afrika, na mwa bangunga. Mu lendaka to dyaka ve kuvutuka. Mu zaba ve. Kasi mu ke tuba na beno, na ntima ya munu nyonso, mu me tuba na beno Kieleka. Mu me tina ve na kuzonza na beno nyonso yina Nzambi vwandaka me tuba na munu. Mpe mu vwandaka me tuba Yawu na Nkumbu ya Mfumu.

²⁴² Ya kele ntangu ya muntu yandi mosi. Mu zaba ve mutindu ya kubasisa yawu. Mu me meka na kubika chaire bambala tatu to yiya, mpe mu lenda ve kusala yawu. Yayi kele ngunga ya konso muntu. Beno zimbana yawu ata fioti ve. Yayi kele ntangu yina, mu banza, Nzambi lendaka sala lubokilu ya Yandi ya nsuka. Mu zaba ve. Yandi ke sala mbokolo ya Yandi ya nsuka, kilumbu mosi. Na wapi ntangu? Mu zaba ve. Kasi mu ke na kutuba na beno, landila vision yango, ya ke talana mutindu ti Kento yango ya makwela na kutala me manisa.

²⁴³ Beno tala mabuundu ya nkumbu kukwiza na kati. Ntangu mwense ya kulala kwizaka samu na Mafuta, yandi kondwaka na kuzwa Yawu. Kento ya makwela kukotaka. Kukwenda na zulu na Elevement kusalamaka. “Na yina bawu kwendaka na kusumba Mafuta, Bakala ya makwela kukwizaka.”

²⁴⁴ Beno kele ya kulala? Beno vumbuka, na nswalu nyonso, mpe beno vutuka na beno mosi. Mpe beto sambila, mosi na mosi, mutindu ti beto ke kufwa na minuti yayi, na Nkumbu ya Mfumu. Ti, mosi na mosi, kusambila na mutindu ya beno mosi.

²⁴⁵ Nzambi ya Ngolo nyonso, vwanda na kyadi na beto. Mfumu, vwanda na kyadi na beto. Vwanda na kyadi na beto nyonso. Wapi mbote ya ke sala, ata yina beto ke sala, kana beto kondwa na bima yayi? Mu me telama awa mpe ke lomba kyadi, O Nzambi, ntete mbanza ya nene yayi kudyama na yisi ya mubu mpe ti

balufundusu ya Nzambi kukombola simu yayi. Mu ke sambila, Nzambi, ti Nge ke bokila Kento ya Nge ya makwela. Mu me pesa bawu na Nge ntangu yayi, na Nkumbu ya Yesu Klisto. Amen. Amen...?...Mu me tuba kieleka...?... 

65-0429E Nsodolo Ya Kento Ya makwela
Hotel Biltmore
Los Angeles, Californie U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org